

פני מי בקש זאת מידכם רמס חצרי ¹³ לא
 תוסיפו הביא מנחת שוא קטרת תועבה
 היא לי חדש ושבת קרא מקרא לא אוכל
 און ועצרה ¹⁴ חדשיכם ומועדיכם שנאה
 נפשי היו עלי לטרח נלאיתי
 נשא ¹⁵ ובפרשכם כפיכם אעלים עיני
 מכם גם כי תרבו תפלה אינני שמע ידיכם
 דמים מלאו ¹⁶ רחצו הזכו הסירו רע
 מעלליכם מנגד עיני חדלו הרע ¹⁷ למדו
 היטב דרשו משפט אשרו חמוץ שפטו
 יתום ריבו אלמנה ׀ ¹⁸ לכו נא ונוכחה
 יאמר יהוה אם יהיו חטאיכם כשנים
 כשלג ילבינו אם יאדימו כתולע כצמר
 יהיו ¹⁹ אם תאבו ושמעתם טוב הארץ
 תאכלו ²⁰ ואם תמאנו ומריתם חרב
 תאכלו כי פי יהוה דבר ׀ ²¹ איכה
 היתה לזונה קריה נאמנה מלאתי משפט
 צדק ילין בה ועתה מרצחים ²² כספך היה
 לסיגים סבאך מהול במים ²³ שריך
 סוררים וחברי גנבים כלו אהב שחד
 ורדף שלמנים יתום לא ישפטו וריב
 אלמנה לא יבוא אליהם ׀ ²⁴
 לכן נאם האדון יהוה צבאות אביר
 ישראל הוי אנחם מצרי ואנקמה
 מאויבי ²⁵ ואשיבה ידי עליך ואצרף כב
 סיגיד ואסירה כל בדיליך ²⁶ ואשיבה
 שפטיך כבראשנה ויעציד כבתחלה אחרי
 כן יקרא לך עיר הצדק קריה
 נאמנה ²⁷ ציון במשפט תפדה ושביה

Isaiah

ישעיה

1 חזון ישעיהו בן אמוץ אשר חזה על
 יהודה וירושלם בימי עזיהו יותם אחז
 יחזקיהו מלכי יהודה ² שמעו שמים
 והאזיני ארץ כי יהוה דבר בנים גדלתי
 ורוממתי והם פשעו בי ³ ידע שור קנהו
 וחמור אבוס בעליו ישראל לא ידע עמי
 לא התבונן ⁴ הוי גוי חטא עם כבד עון
 זרע מרעים בנים משחיתים עזבו את
 יהוה נאצו את קדוש ישראל נזרו
 אחור ⁵ על מה תכו עוד תוסיפו סרה כל
 ראש לחלי וכל לבב דוי ⁶ מכף רגל ועד
 ראש אין בו מתם פצע וחבורה ומכה
 טריה לא זרו ולא חבשו ולא רככה
 בשמן ⁷ ארצכם שממה עריכם שרפות
 אש אדמתכם לנגדכם זרים אכלים אתה
 ושממה כמהפכת זרים ⁸ ונותרה בת ציון
 כסכה בכרם כמלונה במקשה כעיר
 נצורה ⁹ לולי יהוה צבאות הותיר לנו
 שריד כמעט כסדם היינו לעמרה
 דמינו ׀ ¹⁰ שמעו דבר יהוה קציני סדם
 האזינו תורת אלהינו עם עמרה ¹¹ למה לי
 רב זבחיכם יאמר יהוה שבעתי עלות
 אילים וחלב מריאים ודם פרים וכבשים
 ועתודים לא חפצתי ¹² כי תבאו לראות

מפני פחד יהוה ומהדר גאנו¹¹ עיני
 גבהות אדם שפל ושח רום אנשים ונשגב
 יהוה לבדו ביום ההוא¹² כי יום
 ליהוה צבאות על כל גאה ורם ועל כל
 נשא ושפל¹³ ועל כל ארזי הלבנון הרמים
 והנשאים ועל כל אלוני הבשן¹⁴ ועל כל
 ההרים הרמים ועל כל הגבעות
 הנשאות¹⁵ ועל כל מגדל גבה¹ ועל כל
 חומה בצורה¹⁶ ועל כל אניות תרשיש
 ועל כל שכיות החמדה¹⁷ ושח גבהות
 האדם ושפל רום אנשים ונשגב יהוה
 לבדו ביום ההוא¹⁸ והאלילים כליל
 יחלף¹⁹ ובאו במערות צרים ובמחלות
 עפר מפני פחד יהוה ומהדר גאנו בקומו
 לערץ הארץ²⁰ ביום ההוא ישליך האדם
 את אלילי כספו ואת אלילי זהבו אשר
 עשו לו להשתחות לחפר פרות
 ולעטלפים²¹ לבוא בנקרות הצרים
 ובסעפי הסלעים מפני פחד יהוה ומהדר
 גאנו בקומו לערץ הארץ²² חדלו לכם מן
 האדם אשר נשמה באפו כי במה נחשב
 הוא פ

3 כי הנה האדון יהוה צבאות מסיר
 מירושלם ומיהודה משען ומשענה כל
 משען לחם וכל משען מים² גבור ואיש

¹ BHS has been faithful to the Leningrad Codex where there might be a question of the validity of the form and we keep the same form as BHS.

בצדקה²⁸ ושבר פשעים וחטאים יחדו
 ועזבי יהוה יכלו²⁹ כי יבשו מאילים אשר
 חמדתם ותחפרו מהגנות אשר
 בחרתם³⁰ כי תהיו כאלה נבלת עלה
 וכגנה אשר מים אין לה³¹ והיה החסן
 לנערת ופעלו לניצוץ ובערו שניהם יחדו
 ואין מכבה פ

2 הדבר אשר חזה ישעיהו בן אמוץ על
 יהודה וירושלם² והיה באחרית הימים
 נכון יהיה הר בית יהוה בראש ההרים
 ונשא מגבעות ונהרו אליו כל
 הגוים³ והלכו עמים רבים ואמרו לכו
 ונעלה אל הר יהוה אל בית אלהי יעקב
 וירנו מדרכיו ונלכה בארחתיו כי מציון
 תצא תורה ודבר יהוה מירושלם⁴ ושפט
 בין הגוים והוכיח לעמים רבים וכתתו
 חרבותם לאתים וחניתותיהם למזמרות
 לא ישא גוי אל גוי חרב ולא ילמדו עוד
 מלחמה פ

⁵ בית יעקב לכו ונלכה באור יהוה⁶ כי
 נטשתה עמך בית יעקב כי מלאו מקדם
 וענגים כפלשתים ובילדי נכרים
 ישפיקו⁷ ותמלא ארצו כסף וזהב ואין
 קצה לאצרתיו ותמלא ארצו סוסים ואין
 קצה למרכבתיו⁸ ותמלא ארצו אלילים
 למעשה ידיו ישתחוו לאשר עשו
 אצבעתיו⁹ וישח אדם וישפל איש ואל
 תשא להם¹⁰ בוא בצור והטמן בעפר

בנות ציון ויהוה פתהן יערה ¹⁸ ביום
 ההוא יסיר אדני את תפארת העכסים
 והשביסים ¹⁹ והשהרנים הנטיפות
 והשירות והרעלות ²⁰ הפארים והצעדות
 והקשרים ובתי הנפש
 והלחשים ²¹ הטבעות ונזמי
 האף ²² המחלצות והמעטפות והמטפחות
 והחריטים ²³ והגלינים והסדינים והצניפות
 והרדידים ²⁴ והיה תחת בשם מק יהיה
 ותחת חגורה נקפה ותחת מעשה מקשה
 קרחה ותחת פתיגיל מחגרת שק כי תחת
 יפי ²⁵ מתיך בחרב יפלו וגבורתך
 במלחמה ²⁶ ואנו ואבלו פתחיה ונקתה
 לארץ תשב

4 והחזיקו שבע נשים באיש אחד ביום
 ההוא לאמר לחמנו נאכל ושמלתנו נלבש
 רק יקרא שמך עלינו אסף
 חרפתנו ² ביום ההוא יהיה צמח
 יהוה לצבי ולכבוד ופרי הארץ לגאון
 ולתפארת לפליטת ישראל ³ והיה הנשאר
 בציון והנותר בירושלם קדוש יאמר לו כל
 הכתוב לחיים בירושלם ⁴ אם רחץ אדני
 את צאת בנות ציון ואת דמי ירושלם
 ידיח מקרבה ברוח משפט וברוח
 בער ⁵ וברא יהוה על כל מכוון הר ציון ועל
 מקראה ענן יומם ועשן ונגה אש להבה
 לילה כי על כל כבוד חפה ⁶ וסכה תהיה
 לצל יומם מחרב ולמחסה ולמסתור מזרם

מלחמה שופט ונביא וקסם וזקן ³ שר
 חמשים ונשוא פנים ויועץ וחכם חרשים
 ונבון לחש ⁴ ונתתי נערים שריהם
 ותעלולים ימשלו ⁵ בם ונגש העם איש
 באיש ואיש ברעהו ירהבו הנער בזקן
 והנקלה בנכבד ⁶ כי יתפש איש באחיו
 בית אביו שמלה לכה קצין תהיה לנו
 והמכשלה הזאת תחת ירך ⁷ ישא ביום
 ההוא לאמר לא אהיה חבש ובביתי אין
 לחם ואין שמלה לא תשימני קצין עם ⁸ כי
 כשלה ירושלם ויהודה נפל כי לשונם
 ומעלליהם אל יהוה למרות עני
 כבודו ⁹ הכרת פניהם ענתה בם וחטאתם
 כסדם הגידו לא כחדו אוי לנפשם כי
 גמלו להם רעה ¹⁰ אמרו צדיק כי טוב כי
 פרי מעלליהם יאכלו ¹¹ אוי לרשע רע כי
 גמול ידיו יעשה לו ¹² עמי נגשיו מעולל
 ונשים משלו בו עמי מאשריך מתעים
 ודרך ארחתיך בלעו ¹³ נצב לריב
 יהוה ועמד לדין עמים ¹⁴ יהוה במשפט
 יבוא עם זקני עמו ושריו ואתם בערתם
 הכרם גזלת העני בבתיכם ¹⁵ מלכם מה
 לכם^a תדכאו עמי ופני עניים תטחנו נאם
 אדני יהוה צבאות ¹⁶ ויאמר יהוה
 יען כי גבהו בנות ציון ותלכנה ^{נטויות} נטויות
 גרון ומשקרות עינים הלוך וטפף תלכנה
 וברגליהם תעכסנה ¹⁷ ושפח אדני קדקד

a Adaptations to a Qere which L and BHS, by their design, do not indicate.

וממטר פ

פיה לבלי חק וירד הדרה והמונה ושאוונה
ועלזו בה¹⁵ וישח אדם וישפל איש ועיני
גבהים תשפלנה¹⁶ ויגבה¹ יהוה צבאות
במשפט והאל הקדוש נקדש
בצדקה¹⁷ ורעו כבשים כדברם וחרבות
מחים גרים יאכלו¹⁸ הוי משכי העון
בחבלי השוא וכעבות העגלה
חטאה¹⁹ האמרים ימהר יחישה מעשהו
למען נראה ותקרב ותבואה עצת קדוש
ישראל ונדעה ס²⁰ הוי האמרים לרע
טוב ולטוב רע שמים חשך לאור ואור
לחשך שמים מר למתוק ומתוק
למר ס²¹ הוי חכמים בעיניהם ונגד
פניהם נבנים²² הוי גבורים לשתות יין
ואנשי חיל למסך שכר²³ מצדיקי רשע
עקב שחד וצדקת צדיקים יסירו
ממנו ס²⁴ לכן כאכל קש לשון אש
וחשש להבה ירפה שרשם כמק יהיה
ופרחם כאבק יעלה כי מאסו את תורת
יהוה צבאות ואת אמרת קדוש ישראל
נאצו²⁵ על כן חרה אף יהוה בעמו ויט ידו
עליו ויכהו וירגזו ההרים ותהי נבלתם
כסוחה בקרב חוצות בכל זאת לא שב
אפו ועוד ידו נטויה²⁶ ונשא נס לגוים
מרחוק ושרק לו מקצה הארץ והנה
מהרה קל יבוא²⁷ אין עיף ואין כושל בו
לא ינום ולא יישן ולא נפתח אזור חלציו

5 אשירה נא לידידי שירת דודי לכרמו
כרם היה לידידי בקרן בן שמן² ויעזקהו
ויסקלהו ויטעהו שרק ויבן מגדל בתוכו
וגם יקב חצב בו ויקו לעשות ענבים ויעש
באשים³ ועתה יושב ירושלם ואיש יהודה
שפטו נא ביני ובין כרמי⁴ מה לעשות עוד
לכרמי ולא עשיתי בו מדוע קויתי לעשות
ענבים ויעש באשים⁵ ועתה אודיעה נא
אתכם את אשר אני עשה לכרמי הסר
משוכתו והיה לבער פרץ גדרו והיה
למרמס⁶ ואשיתהו בתה לא יזמר ולא
יעדר ועלה שמיר ושית ועל העבים אצוה
מהמטיר עליו מטר⁷ כי כרם יהוה צבאות
בית ישראל ואיש יהודה נטע שעשועיו
ויקו למשפט והנה משפח לצדקה והנה
צעקה ס⁸ הוי מגיעי בית בבית שדה
בשדה יקריבו עד אפס מקום והושבתם
לבדכם בקרב הארץ⁹ באזני יהוה צבאות
אם לא בתים רבים לשמה יהיו גדלים
וטובים מאין יושב¹⁰ כי עשרת צמדי כרם
יעשו בת אחת וזרע חמר יעשה איפה פ
הוי משכימי בבקר שכר ירדפו מאחרי¹¹
בנשף יין ידליקם¹² והיה כנור ונבל תף
וחליל ויין משתיהם ואת פעל יהוה לא
יביטו ומעשה ידיו לא ראו¹³ לכן גלה עמי
מבלי דעת וכבודו מתי רעב והמונו צחה
צמא¹⁴ לכן הרחיבה שאול נפשה ופערה

1 BHS has been faithful to the Leningrad Codex where there might be a question of the validity of the form and we keep the same form as BHS.

ולבבו יבין ושב ורפא לו¹¹ ואמר עד מתי
 אדני ויאמר עד אשר אם שאו ערים מאין
 יושב ובתים מאין אדם והאדמה תשאה
 שממה¹² ורחק יהוה את האדם ורבה
 העזובה בקרב הארץ¹³ ועוד בה עשריה
 ושבה והיתה לבער כאלה וכאלון אשר
 בשלכת מצבת במ זרע קדש מצבתה פ

7 ויהי בימי אחז בן יותם בן עזיהו מלך
 יהודה עלה רצין מלך ארם ופקח בן
 רמליהו מלך ישראל ירושלם למלחמה
 עליה ולא יכל להלחם עליה² ויגד לבית
 דוד לאמר נחה ארם על אפרים וינע
 לבבו ולבב עמו כנוע עצי יער מפני
 רוח³ ויאמר יהוה אל ישעיהו צא נא
 לקראת אחז אתה ושאר ישוב בנד אל
 קצה תעלת הברכה העליונה אל מסלת
 שדה כובס⁴ ואמרת אליו השמר והשקט
 אל תירא ולבבך אל ירך משני זנבות
 האודים העשנים האלה בחרי אף רצין
 וארם ובן רמליהו⁵ יען כי יעץ עליך ארם
 רעה אפרים ובן רמליהו לאמר⁶ נעלה
 ביהודה ונקיצנה ונבקענה אלינו ונמליך
 מלך בתוכה את בן טבאל ס⁷ כה
 אמר אדני יהוה לא תקום ולא תהיה⁸ כי
 ראש ארם דמשק וראש דמשק רצין
 ובעוד ששים וחמש שנה יחת אפרים
 מעם⁹ וראש אפרים שמרון וראש שמרון
 בן רמליהו אם לא תאמינו כי לא

ולא נתק שרוך נעליו²⁸ אשר חציו שנונים
 וכל קשתתיו דרכות פרסות סוסיו כצר
 נחשבו וגלגליו כסופה²⁹ שאגה לו כלביא
 ושאג ישאג ככפירים וינהם ויאחזו טרף
 ויפליט ואין מציל³⁰ וינהם עליו ביום
 ההוא כנהמת ים ונבט לארץ והנה חשך
 צר ואור חשך בעריפיה פ

6 בשנת מות המלך עזיהו ואראה את
 אדני ישב על כסא רם ונשא ושוליו
 מלאים את ההיכל² שרפים עמדים ממעל
 לו שש כנפים שש כנפים לאחד בשתים
 יכסה פניו ובשתים יכסה רגליו ובשתים
 יעופף³ וקרא זה אל זה ואמר קדוש
 קדוש קדוש יהוה צבאות מלא כל הארץ
 כבודו⁴ וינעו אמות הספים מקול הקורא
 והבית ימלא עשן⁵ ואמר אוי לי כי
 נדמיתי כי איש טמא שפתים אנכי ובתוך
 עם טמא שפתים אנכי יושב כי את המלך
 יהוה צבאות ראו עיני⁶ ויעף אלי אחד מן
 השרפים ובידו רצפה במלקחים לקח
 מעל המזבח⁷ ויגע על פי ויאמר הנה נגע
 זה על שפתיך וסר עונך וחטאתך
 תכפר⁸ ואשמע את קול אדני אמר את
 מי אשלח ומי ילך לנו ואמר הנני
 שלחני⁹ ויאמר לך ואמרת לעם הזה
 שמעו שמוע ואל תבינו וראו ראו ואל
 תדעו¹⁰ השמן לב העם הזה ואזניו הכבד
 ועיניו השע פן יראה בעיניו ובאזניו ישמע

אלף גפן באלף כסף לשמיר ולשית
 יהיה²⁴ בחצים ובקשת יבוא שמה כי
 שמיר ושית תהיה כל הארץ²⁵ וכל
 ההרים אשר במעדר יעדרון לא תבוא
 שמה יראת שמיר ושית והיה למשלח
 שור ולמרמס שה פ

8 ויאמר יהוה אלי קח לך גליון גדול
 וכתב עליו בחרט אנוש למהר שלל חש
 בז² ואעידה לי עדים נאמנים את אוריה
 הכהן ואת זכריהו בן יברכיהו³ ואקרב
 אל הנביאה ותהר ותלד בן ויאמר יהוה
 אלי קרא שמו מהר שלל חש בז⁴ כי
 בטרם ידע הנער קרא אבי ואמי ישא את
 חיל דמשק ואת שלל שמרון לפני מלך
 אשור⁵ ויסף יהוה דבר אלי עוד
 לאמר⁶ יען כי מאס העם הזה את מי
 השלח ההלכים לאט ומשוש את רצין ובן
 רמליהו⁷ ולכן הנה אדני מעלה עליהם
 את מי הנהר העצומים והרבים את מלך
 אשור ואת כל כבודו ועלה על כל אפיקיו
 והלך על כל גדותיו⁸ וחלף ביהודה שטף
 ועבר עד צואר יגיע והיה מטות כנפיו
 מלא רחב ארצך עמנו אל⁹ רעו
 עמים וחתו והאזינו כל מרחקי ארץ
 התאזרו וחתו התאזרו וחתו¹⁰ עצו עצה
 ותפר דברו דבר ולא יקום כי עמנו
 אל¹¹ כי כה אמר יהוה אלי כחזקת
 היד ויסרני מלכת בדרך העם הזה

תאמנו¹⁰ ויוסף יהוה דבר אל אחז
 לאמר¹¹ שאל לך אות מעם יהוה אלהיך
 העמק שאלה או הגבה למעלה¹² ויאמר
 אחז לא אשאל ולא אנסה את
 יהוה¹³ ויאמר שמעו נא בית דוד המעט
 מכם הלאות אנשים כי תלאו גם את
 אלהי¹⁴ לכן יתן אדני הוא לכם אות הנה
 העלמה הרה וילדת בן וקראת שמו עמנו
 אל¹⁵ חמאה ודבש יאכל לדעתו מאוס
 ברע ובחור בטוב¹⁶ כי בטרם ידע הנער
 מאס ברע ובחר בטוב תעזב האדמה
 אשר אתה קץ מפני שני מלכיה¹⁷ יביא
 יהוה עליך ועל עמך ועל בית אביך ימים
 אשר לא באו למיום סור אפרים מעל
 יהודה את מלך אשור פ
¹⁸ והיה ביום ההוא ישרק יהוה לזבוב
 אשר בקצה יארי מצרים ולדבורה אשר
 בארץ אשור¹⁹ ובאו ונחו כלם בנחלי
 הבתות ובנקיקי הסלעים ובכל הנעצוצים
 ובכל הנהללים²⁰ ביום ההוא יגלח אדני
 בתער השכירה בעברי נהר במלך אשור
 את הראש ושער הרגלים^c וגם את הזקן
 תספה²¹ והיה ביום ההוא יחיה
 איש עגלת בקר ושתי צאן²² והיה מרב
 עשות חלב יאכל חמאה כי חמאה ודבש
 יאכל כל הנותר בקרב הארץ²³ והיה
 ביום ההוא יהיה כל מקום אשר יהיה שם

^c We read one or more accents in L differently than BHS. Often this notation indicates a typographical error in BHS.

השמחה שמחו לפניך כשמחת בקציר
 כאשר יגילו בחלקם שלל³ כי את על
 סבלו ואת מטה שכמו שבט הנגש בו
 החתת כיום מדין⁴ כי כל סאון סאן
 ברעש ושמלה מגוללה בדמים והיתה
 לשרפה מאכלת אש⁵ כי ילד לנו בן
 נתן לנו ותהי המשרה על שכמו ויקרא
 שמו פלא יועץ אל גבור אביעד שר
 שלום⁶ לסרבה למרבה המשרה ולשלום
 אין קץ על כסא דוד ועל ממלכתו להכין
 אתה ולסעדה במשפט ובצדקה מעתה
 ועד עולם קנאת יהוה צבאות תעשה
 זאת⁷ דבר שלח אדני ביעקב ונפל
 בישראל⁸ וידעו העם כלו אפרים ויושב
 שמרון בגאווה ובגדל לבב לאמר⁹ לבנים
 נפלו וגזית נבנה שקמים גדעו וארזים
 נחליף¹⁰ וישגב יהוה את צרי רצין עליו
 ואת איביו יסכסך¹¹ ארם מקדם
 ופלשתים מאחור ויאכלו את ישראל בכל
 פה בכל זאת לא שב אפו ועוד ידו
 נטויה¹² והעם לא שב עד המכהו ואת
 יהוה צבאות לא דרשו¹³ ויכרת
 יהוה מישראל ראש זנב כפה ואגמון יום
 אחד¹⁴ זקן ונשוא פנים הוא הראש ונביא
 מורה שקר הוא הזנב¹⁵ ויהיו מאשרי
 העם הזה מתעים ומאשריו מבלעים¹⁶ על
 כן על בחוריו לא ישמח אדני ואת יתמיו
 ואת אלמנתיו לא ירחם כי כלו חנף ומרע

לאמר¹² לא תאמרון קשר לכל אשר
 יאמר העם הזה קשר ואת מוראו לא
 תיראו ולא תעריצו¹³ את יהוה צבאות
 אתו תקדישו והוא מוראכם והוא
 מערצכם¹⁴ והיה למקדש ולאבן נגף
 ולצור מכשול לשני בתי ישראל לפח
 ולמוקש ליושב ירושלם¹⁵ וכשלו במ
 רבים ונפלו ונשברו ונוקשו
 ונלכדו¹⁶ צור תעודה חתום תורה
 בלמדי¹⁷ וחכיתי ליהוה המסתיר פניו
 מבית יעקב וקויתי לו¹⁸ הנה אנכי
 והילדים אשר נתן לי יהוה לאתות
 ולמופתים בישראל מעם יהוה צבאות
 השכן בהר ציון¹⁹ וכי יאמרו אליכם
 דרשו אל האבות ואל הידענים
 המצפצפים והמהגים הלוא עם אל אלהיו
 ידרש בעד החיים אל המתים²⁰ לתורה
 ולתעודה אם לא יאמרו כדבר הזה אשר
 אין לו שחר²¹ ועבר בה נקשה ורעב והיה
 כי ירעב והתקצף וקלל במלכו ובאלהיו
 ופנה למעלה²² ואל ארץ יביט והנה צרה
 וחשכה מעוף צוקה ואפלה מנדח²³ כי
 לא מועף לאשר מוצק לה כעת הראשון
 הקל ארצה זבלון וארצה נפתלי והאחרון
 הכביד דרך הים עבר הירדן גליל הגוים

9 העם ההלכים בחשך ראו אור גדול
 ישבי בארץ צלמות אור נגה
 עליהם² הרבית הגוי לא³ לו הגדלת

F Marks a consonant with an anomalous final form that is word-medial.

האליל ופסיליהם מירושלם
 ומשמרון¹¹ הלא כאשר עשיתי לשמרון
 ולאליה כן אעשה לירושלם
 ולעצביה ׀¹² והיה כי יבצע אדני את
 כל מעשהו בהר ציון ובירושלם אפקד על
 פרי גדל לבב מלך אשור ועל תפארת
 רום עיניו¹³ כי אמר בכח ידי עשיתי
 ובחכמתי כי נבנותי ואסיר גבולת עמים
ועתידתיהם **ועתודותיהם** שושתי ואוריד
 כאביר יושבים¹⁴ ותמצא כקן ידי לחיל
 העמים וכאסף ביצים עזבות כל הארץ
 אני אספתי ולא היה נדד כנף ופצה פה
 ומצפצף¹⁵ היתפאר הגרזן על החצב בו
 אם יתגדל המשור על מניפו כהניף שבט
 ואת מרימיו כהרים מטה לא עץ¹⁶ לכן
 ישלח האדון יהוה צבאות במשמנו רזון
 ותחת כבדו יקד יקד כיקוד אש¹⁷ והיה
 אור ישראל לאש וקדושו ללהבה ובערה
 ואכלה שיתו ושמירו ביום אחד¹⁸ וכבוד
 יערו וכרמלו מנפש ועד בשר יכלה והיה
 כמסס נסס¹⁹ ושאר עץ יערו מספר יהיו
 ונער יכתבם ׀
²⁰ והיה ביום ההוא לא יוסיף עוד שאר
 ישראל ופליטת בית יעקב להשען על
 מכהו ונשען על יהוה קדוש ישראל
 באמת²¹ שאר ישוב שאר יעקב אל אל
 גבור²² כי אם יהיה עמך ישראל כחול
 הים שאר ישוב בו כליון חרוץ שוטף
 צדקה²³ כי כלה ונחרצה אדני יהוה

וכל פה דבר נבלה בכל זאת לא שב אפו
 ועוד ידו נטויה¹⁷ כי בערה כאש רשעה
 שמיר ושית תאכל ותצת בסבכי היער
 ויתאבכו גאות עשן¹⁸ בעברת יהוה
 צבאות נעתם ארץ ויהי העם כמאכלת
 אש איש אל אחיו לא יחמלו¹⁹ ויגזר על
 ימין ורעב ויאכל על שמאול ולא שבעו
 איש בשר זרעו יאכלו²⁰ מנשה את
 אפרים ואפרים את מנשה יחדו המה על
 יהודה בכל זאת לא שב אפו ועוד ידו
 נטויה ׀

10 הוי החקקים חקקי און ומכתבים
 עמל כתבו² להטות מדין דלים ולגזל
 משפט עניי עמי להיות אלמנות שללם
 ואת יתומים יבזו³ ומה תעשו ליום פקדה
 ולשואה ממרחק תבוא על מי תנוסו
 לעזרה ואנה תעזבו כבודכם⁴ בלתי כרע
 תחת אסיר ותחת הרוגים יפלו בכל זאת
 לא שב אפו ועוד ידו נטויה ׀⁵ הוי
 אשור שבט אפי ומטה הוא בידם
 זעמי⁶ בגוי חנף אשלחנו ועל עם עברתי
 אצונו לשלל שלל ולבז בז **ולשימו** **ולשומו**
 מרמס כחמר חוצות⁷ והוא לא כן ידמה
 ולבבו לא כן יחשב כי להשמיד בלבבו
 ולהכרית גוים לא מעט⁸ כי יאמר הלא
 שרי יחדו מלכים⁹ הלא ככרכמיש כלנו
 אם לא כארפד חמת אם לא כדמשק
 שמרון¹⁰ כאשר מצאה ידי לממלכת

מתניו והאמונה אזור חלציו⁶ וגר זאב עם
 כבש ונמר עם גדי ירבץ ועגל וכפיר
 ומריא יחדו ונער קטן נהג במ⁷ ופרה ודב
 תרעינה יחדו ירבצו ילדיהן ואריה כבקר
 יאכל תבן⁸ ושעשע יונק על חר פתן ועל
 מאורת צפעוני גמול ידו הדה⁹ לא ירעו
 ולא ישחיתו בכל הר קדשי כי מלאה
 הארץ דעה את יהוה כמים לים מכסים פ
¹⁰ והיה ביום ההוא שרש ישי אשר עמד
 לנס עמים אליו גוים ידרשו והיתה מנחתו
 כבוד פ

¹¹ והיה ביום ההוא יוסיף אדני שנית ידו
 לקנות את שאר עמו אשר ישאר מאשור
 וממצרים ומפתרוס ומכוש ומעילים
 ומשנער ומחמת ומאיי הים¹² ונשא נס
 לגוים ואסף נדחי ישראל ונפצות יהודה
 יקבץ מארבע כנפות הארץ¹³ וסרה
 קנאת אפרים וצררי יהודה יכרתו אפרים
 לא יקנא את יהודה ויהודה לא יצר את
 אפרים¹⁴ ועפו בכתף פלשתים ימה יחדו
 יבזו את בני קדם אדום ומואב משלוח¹
 ידם ובני עמון משמעתם¹⁵ והחרים יהוה
 את לשון ים מצרים והניף ידו על הנהר
 בעים רוחו והכהו לשבעה נחלים והדריך
 בנעלים¹⁶ והיתה מסלה לשאר עמו אשר
 ישאר מאשור כאשר היתה לישראל ביום
 עלתו מארץ מצרים

צבאות עשה בקרב כל הארץ פ ²⁴ לכן
 כה אמר אדני יהוה צבאות אל תירא עמי
 ישב ציון מאשור בשבט יככה ומטהו
 ישא עליך בדרך מצרים²⁵ כי עוד מעט
 מזער וכלה זעם ואפי על
 תבליתם²⁶ ועורר עליו יהוה צבאות שוט
 כמכת מדין בצור עורב ומטהו על הים
 ונשאו בדרך מצרים²⁷ והיה ביום ההוא
 יסור סבלו מעל שכמך ועלו מעל צוארך
 וחבל על מפני שמן²⁸ בא על עית עבר
 במגרזן למכמש יפקיד כליו²⁹ עברו
 מעברה גבע מלון לנו חרדה הרמה גבעת
 שאול נסה³⁰ צהלי קולך בת גלים
 הקשיבי לישה עניה ענתות³¹ נדדה
 מדמנה ישבי הגבים העיזו³² עוד היום
 בנב לעמד ינפף ידו הר **בית** בת ציון גבעת
 ירושלם פ ³³ הנה האדון יהוה צבאות
 מסעף פארה במערצה ורמי הקומה
 גדועים והגבהים ישפלו³⁴ ונקף סבכי
 היער בברזל והלבנון באדיר יפול פ

11 ויצא חטר מגזע ישי ונצר משרשיו
 יפרה² ונחה עליו רוח יהוה רוח חכמה
 ובינה רוח עצה וגבורה רוח דעת ויראת
 יהוה³ והריחו ביראת יהוה ולא למראה
 עיניו ישפוט ולא למשמע אזניו
 יוכיח⁴ ושפט בצדק דלים והוכיח
 במישור לענוי ארץ והכה ארץ בשבט פיו
 וברוח שפתיו ימית רשע⁵ והיה צדק אזור

1 BHS has been faithful to the Leningrad Codex where there might be a question of the validity of the form and we keep the same form as BHS.

וחרון אף לשום הארץ לשמה וחטאיה
 ישמיד ממנה¹⁰ כי כוכבי השמים
 וכסיליהם לא יהלו אורם חשך השמש
 בצאתו וירח לא יגיה אורו¹¹ c ופקדתי על
 תבל רעה ועל רשעים עונם והשבתי גאון
 זדים וגאות עריצים אשפיל¹² אוקיר
 אנוש מפז ואדם מכתם אופיר¹³ על כן
 שמים ארגזו ותרעש הארץ ממקומה
 בעברת יהוה צבאות וביום חרון
 אפו¹⁴ והיה כצבי מדח וכצאן ואין מקבץ
 איש אל עמו יפנו ואיש אל ארצו
 ינוסו¹⁵ כל הנמצא ידקר וכל הנספה יפול
 בחרב¹⁶ ועלליהם ירטשו לעיניהם ישסו
 בתיהם ונשיהם תשגלנה¹⁷ תשכבנה¹⁷ הגני
 מעיר עליהם את מדי אשר כסף לא
 יחשבו וזהב לא יחפצו בו¹⁸ וקשתות
 נערים תרטשנה ופרי בטן לא ירחמו על
 בנים לא תחוס עינם¹⁹ והיתה בבל צבי
 ממלכות תפארת גאון כשדים כמהפכת
 אלהים את סדם ואת עמרה²⁰ לא תשב
 לנצח ולא תשכן עד דור ודור ולא יהל
 שם ערבי ורעים לא ירבצו שם²¹ ורבצו
 שם ציים ומלאו בתיהם אחים ושכנו שם
 בנות יענה ושעירים ירקדו שם²² וענה
 איים באלמנותיו¹ ותנים בהיכלי ענג
 וקרוב לבוא עתה וימיה לא ימשכו

c We read one or more accents in L differently than BHS. Often this notation indicates a typographical error in BHS.

1 BHS has been faithful to the Leningrad Codex where there might be a question of the validity of the form and we keep the same form as BHS.

12 ואמרת ביום ההוא אודך יהוה כי
 אנפת בי ישב אפך ותנחמני² הנה אל
 ישועתי אבטח ולא אפחד כי עזי זמרת
 יה יהוה ויהי לי לישועה³ ושאתם מים
 בששון ממעיני הישועה⁴ ואמרתם ביום
 ההוא הודו ליהוה קראו בשמו הודיעו
 בעמים עלילתיו הזכירו כי נשגב
 שמו⁵ זמרו יהוה כי גאות עשה מידעת
 מודעת זאת בכל הארץ⁶ צהלי ורני
 יושבת ציון כי גדול בקרבך קדוש
 ישראל פ

13 משא בבל אשר חזה ישעיהו בן
 אמוץ² על הר נשפה שאו נס הרימו קול
 להם הניפו יד ויבאו פתחי נדיבים³ אני
 צויתי למקדשי גם קראתי גבורי לאפי
 עליזי גאותי⁴ קול המון בהרים דמות עם
 רב קול שאון ממלכות גוים נאספים יהוה
 צבאות מפקד צבא מלחמה⁵ באים
 מארץ מרחק מקצה השמים יהוה וכלי
 זעמו לחבל כל הארץ⁶ הלילו כי קרוב
 יום יהוה כשד משדי יבוא⁷ על כן כל
 ידים תרפינה וכל לבב אנוש ימס¹
⁸ ונבהלו צירים וחבלים יאחזון כיולדה
 יחילון איש אל רעהו יתמהו פני להבים
 פניהם⁹ הנה יום יהוה בא אכזרי ועברה

1 BHS has been faithful to the Leningrad Codex where there might be a question of the validity of the form and we keep the same form as BHS.

בור¹⁶ ראיך אליך ישגיוחו אליך יתבוננו
 הזה האיש מרגיז הארץ מרעיש
 ממלכות¹⁷ שם תבל כמדבר ועריו הרס
 אסיריו לא פתח ביתה¹⁸ כל מלכי גוים
 כלם שכבו בכבוד איש בביתו¹⁹ ואתה
 השלכת מקברך כנצר נתעב לבוש הרגים
 מטעני חרב יורדי אל אבני בור כפגר
 מובס²⁰ לא תחד אתם בקבורה כי ארצך
 שחת עמך הרגת לא יקרא לעולם זרע
 מרעים²¹ הכינו לבניו מטבח בעון אבותם
 בל יקמו וירשו ארץ ומלאו פני תבל
 ערים²² וקמתי עליהם נאם יהוה צבאות
 והכרתי לבבל שם ושאר ונין ונכד נאם
 יהוה²³ ושמתי למורש קפד ואגמי מים
 וטאטאתיה במטאטא השמד נאם יהוה
 צבאות פ

²⁴ נשבע יהוה צבאות לאמר אם לא
 כאשר דמיתי כן היתה וכאשר יעצתי היא
 תקום²⁵ לשבר אשור בארצי ועל הרי
 אבוסנו וסר מעליהם עלו וסבלו מעל
 שכמו יסור²⁶ זאת העצה היעוצה על כל
 הארץ וזאת היד הנטויה על כל
 הגוים²⁷ כי יהוה צבאות יעץ ומי יפר וידו
 הנטויה ומי ישיבנה פ
²⁸ בשנת מות המלך אחז היה המשא
 הזה²⁹ אל תשמחי פלשת כלך כי נשבר
 שבט מכך כי משרש נחש יצא צפע ופריו
 שרף מעופף³⁰ ורעו בכורי דלים ואביונים
 לבטח ירבצו והמתי ברעב שרשך

14 כי ירחם יהוה את יעקב ובחר עוד
 בישראל והניחם על אדמתם ונלוה הגר
 עליהם ונספחו על בית יעקב² ולקחום
 עמים והביאום אל מקומם והתנחלום
 בית ישראל על אדמת יהוה לעבדים
 ולשפחות והיו שבים לשביהם ורדו
 בנגשיהם פ ויהיה ביום הניח יהוה לך
 מעצבך ומרגזך ומן העבדה הקשה אשר
 עבד בך⁴ ונשאת המשל הזה על מלך
 בבל ואמרת איך שבת נגש שבתה
 מדהבה⁵ שבר יהוה מטה רשעים שבט
 משלים⁶ מכה עמים בעברה מכת בלתי
 סרה רדה באף גוים מרדף בלי
 חשך⁷ נחה שקטה כל הארץ פצחו
 רנה⁸ גם ברושים שמחו לך ארזי לבנון
 מאז שכבת לא יעלה הכרת עלינו⁹ שאול
 מתחת רגזה לך לקראת בואך עורר לך
 רפאים כל עתודי ארץ הקים מכסאותם
 כל מלכי גוים¹⁰ כלם יענו ויאמרו אליך
 גם אתה חלית כמונו אלינו
 נמשלת¹¹ הורד שאול גאונך המית נבליך
 תחתך יצע רמה ומכסיך תולעה¹² איך
 נפלת משמים הליל בן שחר נגדעת לארץ
 חולש על גוים¹³ ואתה אמרת בלבבך
 השמים אעלה ממעל לכוכבי אל ארים
 כסאי ואשב בהר מועד בירכתי
 צפון¹⁴ אעלה על במתי עב אדמה
 לעליון¹⁵ אך אל שאול תורד אל ירכתי

שיתי כליל צלך בתוך צהרים סתרי
 נדחים נדד אל תגלי⁴ יגורו בך נדחי
 מואב הוי סתר למו מפני שודד כי אפס
 המץ כלה שד תמו רמס מן הארץ⁵ והוכן
 בחסד כסא וישב עליו באמת באהל דוד
 שפט ודרש משפט ומהר צדק⁶ שמענו
 גאון מואב גא מאד גאותו וגאונו ועברתו
 לא כן בדיו ׀⁷ לכן ייליל מואב למואב
 כלה ייליל לאשישי קיר חרשת תהגו אך
 נכאים⁸ כי שדמות חשבון אמלל גפן
 שבמה בעלי גוים הלמו שרוקיה עד יעזר
 נגעו תעו מדבר שלחותיה נטשו עברו
 ים⁹ על כן אבכה בבכי יעזר גפן שבמה
 אריזך דמעתי חשבון ואלעלה כי על
 קיצך ועל קצירך הידד נפל¹⁰ ונאסף
 שמחה וגיל מן הכרמל ובכרמים לא ירנן
 לא ירעע יין ביקבים לא ידרך הדרך הידד
 השבתי¹¹ על כן מעי למואב ככנור יהמו
 וקרבי לקיר חרש¹² והיה כי נראה כי
 נלאה מואב על הבמה ובא אל מקדשו
 להתפלל ולא יוכל¹³ זה הדבר אשר דבר
 יהוה אל מואב מאז¹⁴ ועתה דבר יהוה
 לאמר בשלש שנים כשני שכיר ונקלה
 כבוד מואב בכל ההמון הרב ושאר מעט
 מזער לוא כביר ׀

17 משא דמשק הנה דמשק מוסר
 מעיר והיתה מעי מפלה² עזבות ערי
 ערער לעדרים תהיינה ורבצו ואין

ושאריתך יהרג³¹ הילילי שער זעקי עיר
 נמוג פלשת כלך כי מצפון עשן בא ואין
 בודד במועדיו³² ומה יענה מלאכי גוי כי
 יהוה יסד ציון ובה יחסו עניי עמו ׀

15 משא מואב כי בליל שדד ער מואב
 נדמה כי בליל שדד קיר מואב
 נדמה² עלה הבית ודיבן הבמות לבכי על
 נבו ועל מידבא מואב ייליל בכל ראשיו
 קרחה כל זקן גרועה³ בחוצתיו חגרו שק
 על גגותיה וברחבתיה כלה ייליל ירד
 בבכי⁴ ותזעק חשבון ואלעלה עד יהן
 נשמע קולם על כן חלצי מואב יריעו
 נפשו ירעה לו⁵ לבי למואב יזעק בריחה
 עד צער עגלת שלשיה כי מעלה הלוחית
 בבכי יעלה בו כי דרך חורנים זעקת שבר
 יעערו⁶ כי מי נמרים משמות יהיו כי יבש
 חציר כלה דשא ירק לא היה⁷ על כן
 יתרה עשה ופקדתם על נחל הערבים
 ישאום⁸ כי הקיפה הזעקה את גבול
 מואב עד אגלים יללתה ובאר אילים
 יללתה⁹ כי מי דימון מלאו דם כי אשית
 על דימון נוספות לפליטת מואב אריה
 ולשארית אדמה

16 שלחו כר משל ארץ מסלע מדברה
 אל הר בת ציון² והיה כעוף נודד קן
 משלח תהיינה בנות מואב מעברת
 לארנון³ הביאו הביאי עצה עשו פלילה

18 הוי ארץ צלצל כנפים אשר מעבר לנהרי כוש² השלח בים צירים ובכלי גמא על פני מים לכו מלאכים קלים אל גוי ממשך ומורט אל עם נורא מן הוא והלאה גוי קו קו ומבוסה אשר בזאו נהרים ארצו³ כל ישבי תבל ושכני ארץ כנשא נס הרים תראו וכתקע שופר תשמעו ׀⁴ כי כה אמר יהוה אלי **אשקוטה** ואביטה במכוני כחם צח עלי אור כעב טל בחם קציר⁵ כי לפני קציר כתם פרח ובסר גמל יהיה נצה וכרת הזלזלים במזמרות ואת הנטישות הסיר התז⁶ יעזבו יחדו לעיט הרים ולבהמת הארץ וקץ עליו העיט וכל בהמת הארץ עליו תחרף⁷ בעת ההיא יובל שי ליהוה צבאות עם ממשך ומורט ומעם נורא מן הוא והלאה גוי קו קו ומבוסה אשר בזאו נהרים ארצו אל מקום שם יהוה צבאות הר ציון ׀

19 משא מצרים הנה יהוה רכב על עב קל ובא מצרים ונעו אלילי מצרים מפניו ולבב מצרים ימס בקרבו² וסכסכתי מצרים במצרים ונלחמו איש באחיו ואיש ברעהו עיר בעיר ממלכה בממלכה³ ונבקה רוח מצרים בקרבו ועצתו אבלע ודרשו אל האלילים ואל האטים ואל האבות ואל הידענים⁴ וסכרתי את מצרים ביד אדנים

מחריד³ ונשבת מבצר מאפרים וממלכה מדמשק ושאר ארם ככבוד בני ישראל יהיו נאם יהוה צבאות ׀⁴ והיה ביום ההוא ידל כבוד יעקב ומשמן בשרו ירזה⁵ והיה כאסף קציר קמה וזרעו שבלים יקצור והיה כמלקט שבלים בעמק רפאים⁶ ונשאר בו עוללת כנקף זית שנים שלשה גרגרים בראש אמיר ארבעה חמשה בסעפיה פריה נאם יהוה אלהי ישראל ׀⁷ ביום ההוא ישעה האדם על עשהו ועיניו אל קדוש ישראל תראינה⁸ ולא ישעה אל המזבחות מעשה ידיו ואשר עשו אצבעתיו לא יראה והאשרים והחמנים⁹ ביום ההוא יהיו ערי מעזו כעזובת החרש והאמיר אשר עזבו מפני בני ישראל והיתה שממה¹⁰ כי שכחת אלהי ישעך וצור מעזך לא זכרת על כן תטעי נטעי נעמנים וזמרת זר תזרענו¹¹ ביום נטעך תשגשגי ובבקר זרעך תפריחי נד קציר ביום נחלה וכאב אנוש ׀¹² הוי המון עמים רבים כהמות ימים יהמיון ושאון לאמים כשאון מים כבירים ישאון¹³ לאמים כשאון מים רבים ישאון וגער בו ונס ממרחק ורדף כמץ הרים לפני רוח וכגלגל לפני סופה¹⁴ לעת ערב והנה בלהה בטרם בקר איננו זה חלק שוסינו וגורל לבזוינו ׀

לֹאחַת ס ¹⁹ בְּיוֹם הַהוּא יִהְיֶה מִזְבַּח
 לַיהוָה בְּתוֹךְ אֶרֶץ מִצְרַיִם וּמִצְבֵּה אֲצֵל
 גְּבוּלָה לַיהוָה ²⁰ וְהָיָה לְאוֹת וּלְעֵד לַיהוָה
 צְבָאוֹת בְּאֶרֶץ מִצְרַיִם כִּי יִצְעֲקוּ אֵל יְהוָה
 מִפְּנֵי לְחֻצִים וַיִּשְׁלַח לָהֶם מוֹשִׁיעַ וְרַב
 וְהִצִּילֵם ²¹ וְנוֹדַע יְהוָה לְמִצְרַיִם וַיִּדְעוּ
 מִצְרַיִם אֵת יְהוָה בְּיוֹם הַהוּא וְעִבְדוּ זִבְחָה
 וּמִנְחָה וְנִדְרוּ נֶדֶר לַיהוָה וּשְׁלָמוֹ ²² וְנִגְּף
 יְהוָה אֶת מִצְרַיִם נִגְּף וּרְפוּאָה וּשְׁבוּ עַד
 יְהוָה וְנִעְתַּר לָהֶם וּרְפָאֵם ²³ בְּיוֹם הַהוּא
 תִּהְיֶה מַסְלָה מִמִּצְרַיִם אֲשׁוּרָה וּבָא אֲשׁוּר
 בְּמִצְרַיִם וּמִצְרַיִם בְּאֲשׁוּר וְעִבְדוּ מִצְרַיִם
 אֶת אֲשׁוּר ס ²⁴ בְּיוֹם הַהוּא יִהְיֶה
 יִשְׂרָאֵל שְׁלִישִׁיָּה לְמִצְרַיִם וּלְאֲשׁוּר בְּרַכָּה
 בְּקִרְבֵּי הָאָרֶץ ²⁵ אֲשֶׁר בְּרָכּוּ יְהוָה צְבָאוֹת
 לֵאמֹר בְּרוּךְ עַמִּי מִצְרַיִם וּמַעֲשֵׂה יָדֵי
 אֲשׁוּר וּנְחַלְתִּי יִשְׂרָאֵל ס

20 בִּשְׁנַת בָּא תִּרְתֵּן אֲשִׁדּוּדָה בְּשִׁלַּח
 אֶתְּוֹ סִרְגוֹן מֶלֶךְ אֲשׁוּר וַיִּלְחַם בְּאֲשִׁדּוּד
 וַיִּלְכְּדָה ² בַּעַת הַהִיא דָּבַר יְהוָה בִּיד
 יִשְׁעֵיהֶם בֵּן אַמּוּץ לֵאמֹר לָךְ וּפְתַחַת הַשֶּׁקַּ
 מֵעַל מִתְנַיֵּךְ וְנִעְלַךְ תַּחֲלֵץ מֵעַל רִגְלֵיךְ
 וַיַּעַשׂ כֵּן הַלֵּךְ עָרוֹם וַיַּחֲף ס ³ וַיֹּאמֶר
 יְהוָה כַּאֲשֶׁר הַלֵּךְ עַבְדֵי יִשְׁעֵיהֶם עָרוֹם
 וַיַּחֲף שְׁלֹשׁ שָׁנִים אוֹת וּמוֹפֵת עַל מִצְרַיִם
 וְעַל כּוֹשׁ ⁴ כֵּן יִנְהַג מֶלֶךְ אֲשׁוּר אֶת שְׁבִי
 מִצְרַיִם וְאֶת גְּלוֹת כּוֹשׁ נְעָרִים וְזִקְנִים עָרוֹם
 וַיַּחֲף וַחֲשׂוּפֵי שֵׁת עָרוֹת מִצְרַיִם ⁵ וַחֲתוּ

קֶשֶׁה וּמֶלֶךְ עִזִּי יִמְשַׁל בְּסָם נְאֻם הָאֲדוֹן יְהוָה
 צְבָאוֹת ⁵ וְנִשְׁתּוּ מִיָּם מֵהֵימָּן וְנִהַר יִחְרַב
 וַיִּבֶשׁ ⁶ וְהָאֲזִנִּיחוּ נְהָרוֹת דָּלְלוּ וַחֲרַבּוּ יַאֲרִי
 מִצּוֹר קִנְיָה וְסוּף קִמְלוּ ⁷ עָרוֹת עַל יַאֲוֹר עַל
 פִּי יַאֲוֹר וְכָל מִזְרַע יַאֲוֹר יִיבֶשׁ נִדְף
 וַאֲיִנְנוּ ⁸ וְאִנּוּ הַדִּיגִים וְאִבְלוּ כָל מִשְׁלִיכֵי
 בִּיאֹר חֲכָה וּפְרָשֵׁי מִכְמַרְתָּ עַל פְּנֵי מִיָּם
 אִמְלָלוּ ⁹ וּבִשּׁוּ עַבְדֵי פִשְׁתִּים שְׁרִיקוֹת
 וְאַרְגִּים חוּרֵי ¹⁰ וְהָיוּ שִׁתְתִּיָּה מִדְּכָאִים כָּל
 עֲשֵׂי שֶׁכֶר אֲגַמִּי נִפְשׁ ¹¹ אֶךְ אוֹלִים שְׁרִי
 צַעֲן חֲכָמֵי יַעֲצִי פִרְעָה עֲצָה נִבְעָרָה אִיךְ
 תֹּאמְרוּ אֵל פִּרְעָה בֵּן חֲכָמִים אֲנִי בֵּן מַלְכֵי
 קִדְם ¹² אִים אִפּוּא חֲכָמִיךְ וַיִּגִּדּוּ נָא לָךְ
 וַיִּדְעוּ מַה יַּעֲזֵךְ יְהוָה צְבָאוֹת עַל
 מִצְרַיִם ¹³ נוֹאֲלוּ שְׁרֵי צַעֲן נִשְׂאוּ שְׁרֵי נֶף
 הִתְעוּ אֶת מִצְרַיִם פִּנְתָּ שְׁבִטִיָּה ¹⁴ יְהוָה
 מִסֶּךְ בְּקִרְבָּה רוּחַ עוֹעִים וְהִתְעוּ אֶת
 מִצְרַיִם בְּכָל מַעֲשֵׂהוּ כִּהִתְעוּת שֶׁכוֹר
 בְּקִיאוֹ ¹⁵ וְלֹא יִהְיֶה לְמִצְרַיִם מַעֲשֵׂה אֲשֶׁר
 יַעֲשֶׂה רֹאשׁ וְזִנְבֵי כִפֵּה
 וְאֲגַמּוֹן ס ¹⁶ בְּיוֹם הַהוּא יִהְיֶה מִצְרַיִם
 כְּנִשִּׁים וַחֲרָד וּפְחָד מִפְּנֵי תִנּוּפַת יָד יְהוָה
 צְבָאוֹת אֲשֶׁר הוּא מִנִּיף עֲלֵיו ¹⁷ וְהִיתָה
 אֲדַמַּת יְהוּדָה לְמִצְרַיִם לְחִגָּא כָּל אֲשֶׁר
 יִזְכִּיר אֶתְּהָ אֲלִיו יִפְחָד מִפְּנֵי עֲצַת יְהוָה
 צְבָאוֹת אֲשֶׁר הוּא יוֹעֵץ עֲלֵיו ס ¹⁸ בְּיוֹם
 הַהוּא יִהְיוּ חֲמֵשׁ עָרִים בְּאֶרֶץ מִצְרַיִם
 מִדְּבָרוֹת שִׁפְתָּ כִנְעָן וְנִשְׁבַּעוֹת לַיהוָה
 צְבָאוֹת עִיר הַהֶרֶס יֹאמֶר

ובשו מכוש מבטם ומן מצרים
 תפארתם⁶ ואמר ישב האי הזה ביום
 ההוא הנה כה מבטנו אשר נסנו שם
 לעזרה להנצל מפני מלך אשור ואיך
 נמלט אנחנו ׀

אתיו ׀¹³ משא בערב ביער בערב
 תלינו ארחות דדנים¹⁴ לקראת צמא התיו
 מים ישבי ארץ תימא בלחמו קדמו
 נדד¹⁵ כי מפני חרבות נדדו מפני חרב
 נטושה ומפני קשת דרוכה ומפני כבד
 מלחמה ׀¹⁶ כי כה אמר אדני אלי
 בעוד שנה כשני שכיר וכלה כל כבוד
 קדר¹⁷ ושאר מספר קשת גבורי בני קדר
 ימעטו כי יהוה אלהי ישראל דבר ׀

22 משא גיא חזיון מה לך אפוא כי
 עלית כלך לגגות² תשאות מלאה עיר
 הומיה קריה עליזה חלליך לא חללי חרב
 ולא מתי מלחמה³ כל קציניך נדדו יחד
 מקשת אסרו כל נמצאיך אסרו יחדו
 מרחוק ברחו⁴ על כן אמרתי שעו מני
 אמרר בבכי אל תאיצו לנחמני על שד
 בת עמי⁵ כי יום מהומה ומבוסה ומבוכה
 לאדני יהוה צבאות בגיא חזיון מקרקר
 קר ושוע אל ההר⁶ ועילם נשא אשפה
 ברכב אדם פרשים וקיר ערה מגן⁷ ויהי
 מבחר עמקיך מלאו רכב והפרשים שת
 שתו השערה⁸ ויגל את מסך יהודה ותבט
 ביום ההוא אל נשק בית היער⁹ ואת
 בקיעי עיר דוד ראיתם כי רבו ותקבצו
 את מי הברכה התחתונה¹⁰ ואת בתי
 ירושלם ספרתם ותתצו הבתים לבצר
 החומה¹¹ ומקוה עשיתם בין החמתים
 למי הברכה הישנה ולא הבטתם אל

21 משא מדבר ים כסופות בנגב לחלף
 ממדבר בא מארץ נוראה² חזות קשה
 הגד לי הבוגד בוגד והשודד שודד עלי
 עילם צורי מדי כל אנחתה השבתי³ על
 כן מלאו מתני חלחלה צירים אחזוני
 כצירי יולדה נעויתי משמע נבהלתי
 מראות⁴ תעה לבבי פלצות בעתתני את
 נשף חשקי שם לי לחרדה⁵ ערך השלחן
 צפה הצפית אכול שתה קומו השרים
 משחו מגן פ
⁶ כי כה אמר אלי אדני לך העמד המצפה
 אשר יראה יגיד⁷ וראה רכב צמד פרשים
 רכב חמור רכב גמל והקשיב קשב רב
 קשב⁸ ויקרא אריה על מצפה אדני אנכי
 עמד תמיד יומם ועל משמרתי אנכי נצב
 כל הלילות⁹ והנה זה בא רכב איש צמד
 פרשים ויען ויאמר נפלה נפלה בבל וכל
 פסילי אלהיה שבר לארץ¹⁰ מדשתי ובן
 גרני אשר שמעתי מאת יהוה צבאות
 אלהי ישראל הגדתי לכם ׀¹¹ משא
 דומה אלי קרא משעיר שמר מה מלילה
 שמר מה מליל¹² אמר שמר אתה בקר
 וגם לילה אם תבעיון בעיו שבו

כלי הקטן מכלי האגנות ועד כל כלי הנבלים²⁵ ביום ההוא נאם יהוה צבאות תמוש היתד התקועה במקום נאמן ונגדעה ונפלה ונכרת המשא אשר עליה כי יהוה דבר ס

23 משא צר הלילו אניות תרשיש כי שדד מבית מבוא מארץ כתים נגלה למו² דמו ישבי אי סחר צידון עבר ים מלאוך³ ובמים רבים זרע שחר קציר יאור תבואתה ותהי סחר גוים⁴ בושי צידון כי אמר ים מעוז הים לאמר לא חלתי ולא ילדתי ולא גדלתי בחורים רוממתי בתולות⁵ כאשר שמע למצרים יחילו כשמע צר⁶ עברו תרשישה הלילו ישבי אי⁷ הזאת לכם עליזה מימי קדם קדמתה יבלוה רגליה מרחוק לגור⁸ מי יעץ זאת על צר המעטירה אשר סחריה שרים כנעניה נכבדי ארץ⁹ יהוה צבאות יעצה לחלל גאון כל צבי להקל כל נכבדי ארץ¹⁰ עברי ארצך כיאר בת תרשיש אין מזח עוד¹¹ ידו נטה על הים הרגזי ממלכות יהוה צוה אל כנען לשמד מעזניה¹² ויאמר לא תוסיפי עוד לעלז המעשקה בתולת בת צידון **כתיים** כתיים קומי עברי גם שם לא ינוח לך¹³ הן ארץ כשדים זה העם לא היה אשור יסדה לציים הקימו **בחוניו** עררו ארמנותיה שמה למפלה¹⁴ הלילו אניות תרשיש כי

עשיה ויצרה מרחוק לא ראיתם¹² ויקרא אדני יהוה צבאות ביום ההוא לבכי ולמספד ולקרחה ולחגר שק¹³ והנה ששון ושמחה הרג בקר ושחט צאן אכל בשר ושתות יין אכול ושתו כי מחר נמות¹⁴ ונגלה באזני יהוה צבאות אם יכפר העון^c הזה לכם עד תמתון אמר אדני יהוה צבאות פ¹⁵ כה אמר אדני יהוה צבאות לך בא אל הסכן הזה על שבנא אשר על הבית¹⁶ מה לך פה ומי לך פה כי חצבת לך פה קבר חצבי מרום קברו חקקי בסלע משכן לו¹⁷ הנה יהוה מטלטלך טלטלה גבר ועטך עטה¹⁸ צנוף יצנפך צנפה כדור אל ארץ רחבת ידים שמה תמות ושמה מרכבות כבודך קלון בית אדניך¹⁹ והדפתיך ממצבך וממעמדך יהרסך²⁰ והיה ביום ההוא וקראתי לעבדי לאליקים בן חלקיהו²¹ והלבשתיו כתנתך ואבנטך אחזקנו וממשלתך¹ אתן בידו והיה לאב ליושב ירושלם ולבית יהודה²² ונתתי מפתח בית דוד על שכמו ופתח ואין סגר וסגר ואין פתח²³ ותקעתיו יתד במקום נאמן והיה לכסא כבוד לבית אביו²⁴ ותלו עליו כל כבוד בית אביו הצאצאים והצפעות כל

c We read one or more accents in L differently than BHS. Often this notation indicates a typographical error in BHS.

1 BHS has been faithful to the Leningrad Codex where there might be a question of the validity of the form and we keep the same form as BHS.

מבוא ¹¹ צוחה על היין בחוצות ערבה כל שמחה גלה משוש הארץ ¹² נשאר בעיר שמה ושאייה יכת שער ¹³ כי כה יהיה בקרב הארץ בתוך העמים כנקף זית כעוללת אם כלה בציר ¹⁴ המה ישאו קולם ירנו בגאון יהוה צהלו מים ¹⁵ על כן בארים כבדו יהוה באיי הים שם יהוה אלהי ישראל ¹⁶ מכנף הארץ זמרת שמענו צבי לצדיק ואמר רזי לי רזי לי אוי לי בגדים בגדו ובגד בוגדים בגדו ¹⁷ פחד ופחת ופח עליך יושב הארץ ¹⁸ והיה הנס מקול הפחד יפל אל הפחת והעולה מתוך הפחת ילכד בפח כי ארבות ממרום נפתחו וירעשו מוסדי ארץ ¹⁹ רעה התרעעה הארץ פור התפוררה ארץ מוט התמוטטה ארץ ²⁰ נוע תנוע ארץ כשכור והתנודדה כמלונה וכבד עליה פשעה ונפלה ולא תסיף קום ²¹ והיה ביום ההוא יפקד יהוה על צבא המרום במרום ועל מלכי האדמה על האדמה ²² ואספו אספה אסיר על בור וסגרו על מסגר ומרב ימים יפקדו ²³ וחפרה הלבנה ובושה החמה כי מלך יהוה צבאות בהר ציון ובירושלם ונגד זקניו כבוד ^פ

25 יהוה אלהי אתה ארוממך אודה שמך כי עשית פלא עצות מרחוק אמונה אמן ² כי שמת מעיר לגל קריה בצורה

שדד מעזכן ¹⁵ והיה ביום ההוא ונשכחת צר שבעים שנה כימי מלך אחד מקץ שבעים שנה יהיה לצר כשירת הזונה ¹⁶ קחי כנור סבי עיר זונה נשכחה היטיבי נגן הרבי שיר למען תזכרי ¹⁷ והיה מקץ שבעים שנה יפקד יהוה את צר ושבה לאתננה זנתה את כל ממלכות הארץ על פני האדמה ¹⁸ והיה סחרה ואתננה קדש ליהוה לא יאצר ולא יחסן כי לישבים לפני יהוה יהיה סחרה לאכל לשבעה ולמכסה עתיק ^פ

24 הנה יהוה בוקק הארץ ובולקה ועוה פניה והפיץ ישביה ² והיה כעם ככהן כעבד כאדניו כשפחה כגברתה כקונה כמוכר כמלוה כלוה כנשה כאשר נשא בו ³ הבוק תבוק הארץ והבוז תבוז כי יהוה דבר את הדבר הזה ⁴ אבלה נבלה הארץ אמללה נבלה תבל אמללו מרום עם הארץ ⁵ והארץ חנפה תחת ישביה כי עברו תורת חלפו חק הפרו ברית עולם ⁶ על כן אלה אכלה ארץ ויאשמו ישבי בה על כן חרו ישבי ארץ ונשאר אנוש מזער ⁷ אבל תירוש אמללה גפן נאנחו כל שמחי לב ⁸ שבת משוש תפים חדל שאון עליזים שבת משוש כנור ⁹ בשיר לא ישתו יין ימר שכר לשתי ¹⁰ נשברה קרית תהו סגר כל בית

בך בטוח⁴ בטחו ביהוה עדי עד כי ביה
 יהוה צור עולמים⁵ כי השח ישבי מרום
 קריה נשגבה ישפילנה ישפילה עד ארץ
 יגיענה עד עפר⁶ תרמסנה רגל רגלי עני
 פעמי דלים⁷ ארח לצדיק מישרים ישר
 מעגל צדיק תפלס⁸ אף ארח משפטיך
 יהוה קוינוך לשמך ולזכרך תאות
 נפש⁹ נפשי אויתיך בלילה אף רוחי
 בקרבי אשחרך כי כאשר משפטיך לארץ
 צדק למדו ישבי תבל¹⁰ יחן רשע בל למד
 צדק בארץ נכחות יעול ובל יראה גאות
 יהוה¹¹ יהוה רמה ידך בל יחזיון
 יחזו ויבשו קנאת עם אף אש צריך
 תאכלם¹² יהוה תשפת שלום לנו כי
 גם כל מעשינו פעלת לנו¹³ יהוה אלהינו
 בעלונו אדנים זולתך לבד בך נזכיר
 שמך¹⁴ מתים בל יחיו רפאים בל יקמו
 לכן פקדת ותשמידם ותאבד כל זכר
 למו¹⁵ יספת לגוי יהוה יספת לגוי נכבדת
 רחקת כל קצוי ארץ¹⁶ יהוה בצר פקדוך
 צקון לחש מוסרך למו¹⁷ כמו הרה תקריב
 ללדת תחיל תזעק בחבליה כן היינו
 מפניך יהוה¹⁸ הרינו חלנו כמו ילדנו רוח
 ישועת בל נעשה ארץ ובל יפלו ישבי
 תבל¹⁹ יחיו מתיך נבלתי יקומון הקיצו
 ורננו שכני עפר כי טל אורת טלך וארץ
 רפאים תפיל²⁰ לך עמי בא בחדריך
 וסגר **דלתיך** **דלתיך** בעדך חבי כמעט רגע
 עד **יעבור** **יעבר** זעם²¹ כי הנה יהוה יצא

למפלה ארמון זרים מעיר לעולם לא
 יבנה³ על כן יכבדוך עם עז קרית גוים
 עריצים ייראוך⁴ כי היית מעוז לדל מעוז
 לאביון בצר לו מחסה מזרם צל מחרב כי
 רוח עריצים כזרם קיר⁵ כחרב בציון
 שאון זרים תכניע חרב בצל עב זמיר
 עריצים יענה פ
⁶ ועשה יהוה צבאות לכל העמים בהר
 הזה משתה שמנים משתה שמרים
 שמנים ממחים שמרים מזקקים⁷ ובלע
 בהר הזה פני הלוט הלוט על כל העמים
 והמסכה הנסוכה על כל הגוים⁸ בלע
 המות לנצח ומחה אדני יהוה דמעה מעל
 כל פנים וחרפת עמו יסיר מעל כל הארץ
 כי יהוה דבר פ
⁹ ואמר ביום ההוא הנה אלהינו זה קוינו
 לו ויושיענו זה יהוה קוינו לו נגילה
 ונשמחה בישועתו¹⁰ כי תנוח יד יהוה
 בהר הזה ונדוש מואב תחתיו כהדוש
 מתבן **במי** **במו** מדמנה¹¹ ופרש ידיו בקרבו
 כאשר יפרש השחה לשחות והשפיל
 גאותו עם ארבות ידיו¹² ומבצר משגב
 חומתיך השח השפיל הגיע לארץ עד
 עפר פ

26 ביום ההוא יושר השיר הזה בארץ
 יהודה עיר עז לנו ישועה ישית חומות
 וחל² פתחו שערים ויבא גוי צדיק שמר
 אמנים³ יצר סמוך תצר שלום שלום כי

יהוה משבלת הנהר עד נחל מצרים
 ואתם תלקטו לאחד אחד בני
 ישראל ¹³ והיה ביום ההוא יתקע
 בשופר גדול ובאו האבדים בארץ אשור
 והנדחים בארץ מצרים והשתחוו ליהוה
 בהר הקדש בירושלם

28 הוי עטרת גאות שכרי אפרים וציץ
 נבל צבי תפארתו אשר על ראש גיא
 שמנים הלומי יין ² הנה חזק ואמץ לאדני
 כזרם ברד שער קטב כזרם מים כבירים
 שטפים הניח לארץ ביד ³ ברגלים
 תרמסנה עטרת גאות שכורי
 אפרים ⁴ והיתה ציצת נבל צבי תפארתו
 אשר על ראש גיא שמנים כבכורה ¹
 בטרם קיץ אשר יראה הראה אותה
 בעודה בכפו יבלענה ⁵ ביום ההוא
 יהיה יהוה צבאות לעטרת צבי ולצפירת
 תפארה לשאר עמו ⁶ ולרוח משפט
 ליושב על המשפט ולגבורה משיבי
 מלחמה שערה ⁷ וגם אלה ביין שגו
 ובשכר תעו כהן ונביא שגו בשכר נבלעו
 מן היין תעו מן השכר שגו בראה פקו
 פליליה ⁸ כי כל שלחנות מלאו קיא צאה
 בלי מקום ⁹ את מי יורה דעה ואת
 מי יבין שמועה גמולי מחלב עתיקי
 משדים ¹⁰ כי צו לצו צו לקו לקו לקו

ממקומו לפקד עון ישב הארץ עליו
 וגלתה הארץ את דמיה ולא תכסה עוד
 על הרוגיה ¹¹

27 ביום ההוא יפקד יהוה בחרבו ¹
 הקשה והגדולה והחזקה על לוייתן נחש
 ברח ועל לוייתן נחש עקלתון והרג את
 התנין אשר בים ² ביום ההוא כרם
 חמד ענו לה ³ אני יהוה נצרה לרגעים
 אשקנה פן יפקד עליה לילה ויום
 אצרנה ⁴ חמה אין לי מי יתנני שמיר שית
 במלחמה אפשעה בה אציתנה יחד ⁵ או
 יחזק במעוזי יעשה שלום לי שלום יעשה
 לי ⁶ הבאים ישרש יעקב יציץ ופרח
 ישראל ומלאו פני תבל
 תנובה ⁷ הכמכת מכהו הכהו אם
 כהרג הרגיו הרג ⁸ בסאסאה ^p בשלחה
 תריבנה הגה ברוחו הקשה ביום
 קדים ⁹ לכן בזאת יכפר עון יעקב וזה כל
 פרי הסר חטאתו בשומו כל אבני מזבח
 כאבני גר מנפצות לא יקמו אשרים
 וחמנים ¹⁰ כי עיר בצורה בדד נוה משלח
 ונעזב כמדבר שם ירעה עגל ושם ירבץ
 וכלה סעפיה ¹¹ ביבש קצירה תשברנה
 נשים באות מאירות אותה כי לא עם
 בינות הוא על כן לא ירחמנו עשהו ויצרו
 לא יחננו ¹² והיה ביום ההוא יחבט

¹ BHS has been faithful to the Leningrad Codex where there might be a question of the validity of the form and we keep the same form as BHS.

¹ BHS has been faithful to the Leningrad Codex where there might be a question of the validity of the form and we keep the same form as BHS.

^p We read punctuation in L differently from BHS.

אמרתי²⁴ הכל היום יחרש החרש לזרע
 יפתח וישדד אדמתו²⁵ הלוא אם שוה
 פניה והפיץ קצח וכמן יזרק ושם חטה
 שורה ושערה נסמן וכסמת
 גבלתו²⁶ ויסרו למשפט אלהיו יורנו²⁷ כי
 לא בחרוץ יודש קצח ואופן עגלה על כמן
 יוסב כי במטה יחבט קצח וכמן
 בשבט²⁸ לחם יודק כי לא לנצח אדוש
 ידושנו והמם גלגל עגלתו ופרשיו לא
 ידקנו²⁹ גם זאת מעם יהוה צבאות יצאה
 הפליא עצה הגדיל תושיה ׀

29 הוי אריאל אריאל קרית חנה דוד
 ספו שנה על שנה חגים ינקפו² והציקותי
 לאריאל והיתה תאניה ואניה והיתה לי
 כאריאל³ וחניתי כדור עליך וצרתי עליך
 מצב והקימתי עליך מצרת⁴ ושפלת
 מארץ תדברי ומעפר תשח אמרתך והיה
 כאוב מארץ קולך ומעפר אמרתך
 תצפץ⁵ והיה כאבק דק המון זריך וכמץ
 עבר המון עריצים והיה לפתע
 פתאם⁶ מעם יהוה צבאות תפקד ברעם
 וברעש וקול גדול סופה וסערה ולהב אש
 אוכלה⁷ והיה כחלום חזון לילה המון כל
 הגוים הצבאים על אריאל וכל צביה
 ומצדתה והמציקים לה⁸ והיה כאשר
 יחלם הרעב והנה אוכל והקיץ וריקה
 נפשו וכאשר יחלם הצמא והנה שתה
 והקיץ והנה עיף ונפשו שוקקה כן יהיה

זעיר שם זעיר שם¹¹ כי בלעגי שפה
 ובלשון אחרת ידבר אל העם הזה¹² אשר
 אמר אליהם זאת המנוחה הניחו לעיף
 וזאת המרגעה ולא אבוא שמוע¹³ והיה
 להם דבר יהוה צו לצו צו לקו קו
 לקו זעיר שם זעיר שם למען ילכו וכשלו
 אחור ונשברו ונוקשו ונלכדו ׀
¹⁴ לכן שמעו דבר יהוה אנשי לצון משלי
 העם הזה אשר בירושלם¹⁵ כי אמרתם
 כרתנו ברית את מות ועם שאול עשינו
 חזה **שיט** שוט שוטף כי **עבר** יעבר לא
 יבואנו כי שמנו כזב מחסנו ובשקר
 נסתרנו ׀¹⁶ לכן כה אמר אדני יהוה
 הנני יסד בציון אבן אבן בחן פנת יקרת
 מוסד מוסד המאמין לא יחיש¹⁷ ושמתי
 משפט לקו וצדקה למשקלת ויעה ברד
 מחסה כזב וסתר מים ישטפו¹⁸ וכפר
 בריתכם את מות וחזותכם את שאול לא
 תקום שוט שוטף כי יעבר והייתם לו
 למרמס¹⁹ מדי עברו יקח אתכם כי בבקר
 בבקר יעבר ביום ובלילה והיה רק זועה
 הבין שמועה²⁰ כי קצר המצע מהשתרע
 והמסכה צרה כהתכנס²¹ כי כהר פרצים
 יקום יהוה כעמק בגבעון ירגז לעשות
 מעשהו זר מעשהו ולעבד עבדתו נכריה
 עבדתו²² ועתה אל תתלוצצו פן יחזקו
 מוסריכם כי כלה ונחרצה שמעתי מאת
 אדני יהוה צבאות על כל הארץ²³ האזינו
 ושמעו קולי הקשיבו ושמעו

צדיק ◦ ²² לכן כה אמר יהוה אל בית
יעקב אשר פדה את אברהם לא עתה
יבוש יעקב ולא עתה פניו יחורו ²³ כי
בראתו ילדיו מעשה ידי בקרבו יקדישו
שמי והקדישו את קדוש יעקב ואת אלהי
ישראל יעריצו ²⁴ וידעו תעי רוח בינה
ורוגנים ילמדו לקח

30 הוי בנים סוררים נאם יהוה לעשות
עצה ולא מני ולנסך מסכה ולא רוחי
למען ספות חטאת על חטאת ² ההלכים
לרדת מצרים ופי לא שאלו לעוז במעוז
פרעה ולחסות בצל מצרים ³ והיה לכם
מעוז פרעה לבשת והחסות בצל מצרים
לכלמה ⁴ כי היו בצען שריו ומלאכיו חנס
יגיעו ⁵ כל **הבאיש הביש** על עם לא יועילו
למו לא לעזר ולא להועיל כי לבשת וגם
לחרפה ◦ ⁶ משא בהמות נגב בארץ
צרה וצוקה לביא וליש מהם אפעה ושרף
מעופף ישאו על כתף עירים חילהם ועל
דבשת גמלים אוצרתם על עם לא
יועילו ⁷ ומצרים הבל וריק יעזרו לכן
קראתי לזאת רהב הם שבת ⁸ עתה בוא
כתבה על לוח אתם ועל ספר חקה ותהי
ליום אחרון לעד עד עולם ⁹ כי עם מרי
הוא בנים כחשים בנים לא אבו שמוע
תורת יהוה ¹⁰ אשר אמרו לראים לא
תראו ולחזים לא תחזו לנו נכחות דברו
לנו חלקות חזו מהתלות ¹¹ סורו מני דרך

המון כל הגוים הצבאים על הר
ציון ◦ ⁹ התמהמהו ותמהו השתעשעו
ושעו שכרו ולא יין נעו ולא שכר ¹⁰ כי
נסך עליכם יהוה רוח תרדמה ויעצם את
עיניכם את הנביאים ואת ראשיכם החזים
כסה ¹¹ ותהי לכם חזות הכל כדברי
הספר החתום אשר יתנו אתו אל יודע
הספר ספר לאמר קרא נא זה ואמר לא
אוכל כי חתום הוא ¹² ונתן הספר על
אשר לא ידע ספר לאמר קרא נא זה
ואמר לא ידעתי ספר ◦ ¹³ ויאמר אדני
יען כי נגש העם הזה בפיו ובשפתיו
כבדוני ולבו רחק ממני ותהי יראתם אתי
מצות אנשים מלמדה ¹⁴ לכן הנני יוסף
להפליא את העם הזה הפלא ופלא
ואבדה חכמת חכמיו ובינת נבניו
תסתתר ◦ ¹⁵ הוי המעמיקים מיהוה
לסתר עצה והיה במחשך מעשיהם
ויאמרו מי ראנו ומי יודענו ¹⁶ הפככם אם
כחמר היצר יחשב כי יאמר מעשה
לעשהו לא עשני ויצר אמר ליוצרו לא
הבין ¹⁷ הלוא עוד מעט מזער ושב לבנון
לכרמל והכרמל ליער יחשב ¹⁸ ושמעו
ביום ההוא החרשים דברי ספר ומאפל
ומחשך עיני עורים תראינה ¹⁹ ויספו
ענוים ביהוה שמחה ואביוני אדם בקדוש
ישראל יגילו ²⁰ כי אפס עריץ וכלה לץ
ונכרתו כל שקדי און ²¹ מחטיאי אדם
בדבר ולמוכיח בשער יקשון ויטו בתהו

והיה דשן ושמן ירעה מקניך ביום ההוא
 כר נרחב²⁴ והאלפים והעירים עבדי
 האדמה בליל חמיץ יאכלו אשר זרה
 ברחת ובמזרה²⁵ והיה על כל הר גבה¹
 ועל כל גבעה נשאה פלגים יבלי מים ביום
 הרג רב בנפל מגדלים²⁶ והיה אור הלבנה
 כאור החמה ואור החמה יהיה שבעתים
 כאור שבעת הימים ביום חבש יהוה את
 שבר עמו ומחץ מכתו ירפא²⁷ הנה
 שם יהוה בא ממרחק בער אפו וכבד
 משאה שפתיו מלאו זעם ולשונו כאש
 אכלת²⁸ ורוחו כנחל שוטף עד צואר
 יחצה להנפה גוים בנפת שוא ורסן מתעה
 על לחיי עמים²⁹ השיר יהיה לכם כליל
 התקדש חג ושמחת לבב כהולך בחליל
 לבוא בהר יהוה אל צור
 ישראל³⁰ והשמיע יהוה את הוד קולו
 ונחת זרועו יראה בזעף אף ולהב אש
 אוכלה נפץ זרם ואבן ברד³¹ כי מקול
 יהוה יחת אשור בשבט יכה³² והיה כל
 מעבר מטה מוסדה אשר יניח יהוה עליו
 בתפים ובכנרות ובמלחמות תנופה נלחם
בה **בם**³³ כי ערוך מאתמול תפתה גם **הוא**
היא למלך הוכן העמיק הרחב מדרתה
 אש ועצים הרבה נשמת יהוה כנחל
 גפרית בערה בה³⁴

הטו מני ארח השביתו מפנינו את קדוש
 ישראל¹² לכן כה אמר קדוש
 ישראל יען מאסכם בדבר הזה ותבטחו
 בעשק ונלוז ותשענו עליו¹³ לכן יהיה לכם
 העון הזה כפרץ נפל נבעה בחומה
 נשגבה אשר פתאם לפתע יבוא
 שברה¹⁴ ושברה כשבר נבל יוצרים כתות
 לא יחמל ולא ימצא במכתתו חרש
 לחתות אש מיקוד ולחשף מים מגבא¹⁵
¹⁵ כי כה אמר אדני יהוה קדוש ישראל
 בשובה ונחת תושעון בהשקט ובבטחה
 תהיה גבורתכם ולא אביתם¹⁶ ותאמרו
 לא כי על סוס ננוס על כן תנוסון ועל קל
 נרכב על כן יקלו רדפיכם¹⁷ אלף אחד
 מפני גערת אחד מפני גערת חמשה תנסו
 עד אם נותרתם כתרן על ראש ההר וכנס
 על הגבעה¹⁸ ולכן יחכה יהוה לחננכם
 ולכן ירום לרחמכם כי אלהי משפט יהוה
 אשרי כל חוכי לו¹⁹ כי עם בציון
 ישב בירושלם בכו לא תבכה חנון יחנך
 לקול זעקך כשמעתו ענך²⁰ ונתן לכם
 אדני לחם צר ומים לחץ ולא יכנף עוד
 מוריד והיו עיניך ראות את
 מוריד²¹ ואזניך תשמענה דבר מאחריך
 לאמר זה הדרך לכו בו כי תאמינו וכי
 תשמאלו²² וטמאתם את צפוי פסילי
 כספך ואת אפדת מסכת זהבך תזרם כמו
 דוה צא תאמר לו²³ ונתן מטר זרעך אשר
 תזרע את האדמה ולחם תבואת האדמה

¹ BHS has been faithful to the Leningrad Codex where there might be a question of the validity of the form and we keep the same form as BHS.

נמהרים יבין לדעת ולשון עלגים תמהר
 לדבר צחות⁵ לא יקרא עוד לנבל נדיב
 ולכילי לא יאמר שוע⁶ כי נבל נבלה ידבר
 ולבו יעשה און לעשות חנף ולדבר אל
 יהוה תועה להריק נפש רעב ומשקה
 צמא יחסיר⁷ וכלי כליו רעים הוא זמות
 יעץ לחבל עניים עניים באמרי שקר ובדבר
 אביון משפט⁸ ונדיב נדיבות יעץ והוא על
 נדיבות יקום פ
⁹ נשים שאננות קמנה שמענה קולי בנות
 בטחות האזנה אמרתי¹⁰ ימים על שנה
 תרגזנה בטחות כי כלה בציר אסף בלי
 יבוא¹¹ חרדו שאננות רגזה בטחות
 פשטה וערה וחגורה על חלצים¹² על
 שדים ספדים על שדי חמד על גפן
 פריה¹³ על אדמת עמי קוץ שמיר תעלה
 כי על כל בתי משוש קריה עליזה¹⁴ כי
 ארמון נטש המון עיר עזב עפל ובחן היה
 בעד מערות עד עולם משוש פראים
 מרעה עדרים¹⁵ עד יערה עלינו רוח
 ממרום והיה מדבר לכרמל וכרמל והכרמל
 ליער יחשב¹⁶ ושכן במדבר משפט
 וצדקה בכרמל תשב¹⁷ והיה מעשה
 הצדקה שלום ועבדת הצדקה השקט
 ובטח עד עולם¹⁸ וישב עמי בנוה שלום
 ובמשכנות מבטחים ובמנוחת
 שאננות¹⁹ וברד ברדת היער ובשפלה
 תשפל העיר²⁰ אשריכם זרעי על כל מים
 משלחי רגל השור והחמור ׀

31 הוי הירדים מצרים לעזרה על
 סוסים ישענו ויבטחו על רכב כי רב ועל
 פרשים כי עצמו מאד ולא שעו על קדוש
 ישראל ואת יהוה לא דרשו² וגם הוא
 חכם ויבא רע ואת דבריו לא הסיר וקם
 על בית מרעים ועל עזרת פעלי
 און³ ומצרים אדם ולא אל וסוסיהם בשר
 ולא רוח ויהוה יטה ידו וכשל עוזר ונפל
 עזר ויחדו כלם יכליון ׀⁴ כי כה אמר
 יהוה אלי כאשר יהגה האריה והכפיר על
 טרפו אשר יקרא עליו מלא רעים מקולם
 לא יחת ומהמונם לא יענה כן ירד יהוה
 צבאות לצבא על הר ציון ועל
 גבעתה⁵ כצפרים עפות כן יגן יהוה
 צבאות על ירושלם גנון והציל פסח
 והמליט⁶ שובו לאשר העמיקו סרה בני
 ישראל⁷ כי ביום ההוא ימאסון איש
 אלילי כספו ואלילי זהבו אשר עשו לכם
 ידיכם חטא⁸ ונפל אשור בחרב לא איש
 וחרב לא אדם תאכלנו ונס לו מפני חרב
 ובחוריו למס יהיו⁹ וסלעו ממגור יעבור
 וחתו מנס שריו נאם יהוה אשר אור לו
 בציון ותנור לו בירושלם ׀

32 הן לצדק ימלך מלך ולשרים
 למשפט ישרו² והיה איש כמחבא רוח
 וסתר זרם כפלגי מים בציון כצל סלע
 כבד בארץ עיפה³ ולא תשעינה עיני
 ראים ואזני שמעים תקשבנה⁴ ולבב

ביפיו תחזינה עיניך תראינה ארץ
 מרחקים¹⁸ לבך יהגה אימה איה ספר
 איה שקל איה ספר את המגדלים¹⁹ את
 עם נועז לא תראה עם עמקי שפה
 משמוע נלעג לשון אין בינה²⁰ חזה ציון
 קרית מועדנו עיניך תראינה ירושלם נה
 שאנן אהל בל יצען בל יסע יתדתיו לנצח
 וכל חבליו בל ינתקו²¹ כי אם שם אדיר
 יהוה לנו מקום נהרים יארים רחבי ידים
 בל תלך בו אני שיט וצי אדיר לא
 יעברנו²² כי יהוה שפטנו יהוה מחקקנו
 יהוה מלכנו הוא יזשיענו²³ נטשו חבליך
 בל יחזקו כן תרנם בל פרשו נס אז חלק
 עד שלל מרבה פסחים בזו²⁴ ובל
 יאמר שכן חליתי העם הישב בה נשא
 עון

34 קרבו גוים לשמע ולאמים הקשיבו
 תשמע הארץ ומלאה תבל וכל
 צאצאיה² כי קצף ליהוה על כל הגוים
 וחמה על כל צבאם החרימם נתנם
 לטבח³ וחלליהם ישלכו ופגריהם יעלה
 באשם ונמסו הרים מדמם⁴ ונמקו כל
 צבא השמים ונגלו כספר השמים וכל
 צבאם יבול כנבל עלה מגפן וכנבלת
 מתאנה⁵ כי רותה בשמים חרבי הנה על
 אדום תרד ועל עם חרמי למשפט⁶ חרב
 ליהוה מלאה דם הדשנה מחלב מדם
 כרים ועתודים מחלב כליות אילים כי

33 הוי שודד ואתה לא שדוד ובוגד
 ולא בגדו בו כהתמך שודד תושד כנלתך
 לבגד יבגדו בך ׀ יהוה חננו לך קוינו
 היה זרעם לבקרים אף ישועתנו בעת
 צרה³ מקול המון נדדו עמים מרוממתך
 נפצו גוים⁴ ואסף שללכם אסף החסיל
 כמשק גבים שוקק בו⁵ נשגב יהוה כי
 שכן מרום מלא ציון משפט וצדקה⁶ והיה
 אמונת עתיך חסן ישועת חכמת ודעת
 יראת יהוה היא אוצרו ׀ הן אראלם
 צעקו חצה מלאכי שלום מר
 יבכיון⁸ נשמו מסלות שבת עבר ארח
 הפר ברית מאס ערים לא חשב
 אנוש⁹ אבל אמללה ארץ החפיר לבנון
 קמל היה השרון כערבה ונער בשן
 וכרמל¹⁰ עתה אקום יאמר יהוה עתה
 ארומם עתה אנשא¹¹ תהרו חשש תלדו
 קש רוחכם אש תאכלכם¹² והיו עמים
 משרפות שיד קוצים כסוחים באש
 יצתו ׀ שמעו רחוקים אשר עשיתי
 ודעו קרובים גברתי¹⁴ פחדו בציון חטאים
 אחזה רעדה חנפים מי יגור לנו אש
 אוכלה מי יגור לנו מוקדי עולם¹⁵ הלך
 צדקות ודבר מישרים מאס בבצע
 מעשקות נער כפיו מתמך בשחד אטם
 אזנו משמע דמים ועצם עיניו מראות
 ברע¹⁶ הוא מרומים ישכן מצדות סלעים
 משגבו לחמו נתן מימיו נאמנים¹⁷ מלך

הדר אלהינו ם³ חזקו ידים רפות
 וברכים כשלות אמצו⁴ אמרו לנמהרי לב
 חזקו אל תיראו הנה אלהיכם נקם יבוא
 גמול אלהים הוא יבוא וישעכם⁵ אז
 תפקחנה עיני עורים ואזני חרשים
 תפתחנה⁶ אז ידלג כאיל פסח ותרן לשון
 אלם כי נבקעו במדבר מים ונחלים
 בערבה⁷ והיה השרב לאגם וצמאון
 למבועי מים בנוה תנים רבצה חציר לקנה
 וגמא⁸ והיה שם מסלול ודרך ודרך
 הקדש יקרא לה לא יעברנו טמא והוא
 למו הלך דרך ואוילים לא יתעו⁹ לא יהיה
 שם אריה ופריץ חיות בל יעלנה לא
 תמצא שם והלכו גאולים¹⁰ ופדויי יהוה
 ישבון ובאו ציון ברנה ושמחת עולם על
 ראשם ששון ושמחה ישיגו ונסו יגון
 ואנחה פ

36 ויהי בארבע עשרה שנה למלך
 חזקיהו עלה סנחריב מלך אשור על כל
 ערי יהודה הבצרות ויתפשם² וישלח
 מלך אשור את רב שקה מלכיש
 ירושלמה אל המלך חזקיהו בחיל כבד
 ויעמד בתעלת הברכה העליונה במסלת
 שדה כובס³ ויצא אליו אליקים בן
 חלקיהו אשר על הבית ושבנא הספר
 ויואח בן אסף המזכיר⁴ ויאמר אליהם רב
 שקה אמרו נא אל חזקיהו כה אמר
 המלך הגדול מלך אשור מה הבטחון הזה

זבח ליהוה בבצרה וטבח גדול בארץ
 אדום⁷ וירדו ראמים עמם ופרים עם
 אבירים ורותה ארצם מדם ועפרם מחלב
 ידשן⁸ כי יום נקם ליהוה שנת שלומים
 לריב ציון⁹ ונהפכו נחליה לזפת ועפרה
 לגפרית והיתה ארצה לזפת
 בערה¹⁰ לילה ויומם לא תכבה לעולם
 יעלה עשנה מדור לדור תחרב לנצח
 נצחים אין עבר בה¹¹ וירשוה קאת וקפוד
 וינשוף וערב ישכנו בה ונטה עליה קו
 תהו ואבני בהו¹² חריה ואין שם מלוכה
 יקראו וכל שריה יהיו אפס¹³ ועלתה
 ארמנתיה סירים קמוש וחוח במבצריה
 והיתה נוה תנים חציר לבנות
 יענה¹⁴ ופגשו ציים את איים ושעיר על
 רעהו יקרא אך שם הרגיעה לילית
 ומצאה לה מנוח¹⁵ שמה קננה קפוז
 ותמלט ובקעה ודגרה בצלה אך שם
 נקבצו דיות אשה רעותה¹⁶ דרשו מעל
 ספר יהוה וקראו אחת מהנה לא נעדרה
 אשה רעותה לא פקדו כי פי הוא צוה
 ורוחו הוא קבצן¹⁷ והוא הפיל להן גורל
 וידו חלקתה להם בקו עד עולם יירשוה
 לדור ודור ישכנו בה ם

35 יששום מדבר וציה ותגל ערבה
 ותפרח כחבצלת² פרח תפרח ותגל אף
 גילת ורנן כבוד הלבנון נתן לה הדר
 הכרמל והשרון המה יראו כבוד יהוה

יבטח אתכם חזקיהו אל יהוה לאמר הצל יצילנו יהוה לא תנתן העיר הזאת ביד מלך אשור¹⁶ אל תשמעו אל חזקיהו ׀ כי כה אמר המלך אשור עשו אתי ברכה וצאו אלי ואכלו איש גפנו ואיש תאנתו ושתו איש מי בורו¹⁷ עד באי ולקחתי אתכם אל ארץ כארצכם ארץ דגן ותירוש ארץ לחם וכרמים¹⁸ פן יסית אתכם חזקיהו לאמר יהוה יצילנו ההצילו אלהי הגוים איש את ארצו מיד מלך אשור¹⁹ איה אלהי חמת וארפד איה אלהי ספרוים וכי הצילו את שמרון מידי²⁰ מי בכל אלהי הארצות האלה אשר הצילו את ארצם מידי כי יציל יהוה את ירושלם מידי²¹ ויחרישו ולא ענו אתו דבר כי מצות המלך היא לאמר לא תענהו²² ויבא אליקים בן חלקיהו אשר על הבית ושבנא הסופר ויואח בן אסף המזכיר אל חזקיהו קרועי בגדים ויגידו לו את דברי רב שקה ׀

37 ויהי כשמע המלך חזקיהו ויקרע את בגדיו ויתכס בשק ויבא בית יהוה² וישלח את אליקים אשר על הבית ואת שבנא הסופר ואת זקני הכהנים מתכסים בשקים אל ישעיהו בן אמוץ הנביא³ ויאמרו אליו כה אמר חזקיהו יום צרה ותוכחה ונאצה היום הזה כי באו בנים עד משבר וכח אין ללדה⁴ אולי

אשר בטחת⁵ אמרתי אך דבר שפתים עצה וגבורה למלחמה עתה על מי בטחת כי מרדת בי⁶ הנה בטחת על משענת הקנה הרצוץ הזה על מצרים אשר יסמך איש עליו ובא בכפו ונקבה כן פרעה מלך מצרים לכל הבטחים עליו⁷ וכי תאמר אלי אל יהוה אלהינו בטחנו הלוא הוא אשר הסיר חזקיהו את במתיו ואת מזבחתיו ויאמר ליהודה ולירושלם לפני המזבח הזה תשתחוּ⁸ ועתה התערב נא את אדני המלך אשור ואתנה לך אלפים סוסים אם תוכל לתת לך רכבים עליהם⁹ ואיך תשיב את פני פחת אחד עבדי אדני הקטנים ותבטח לך על מצרים לרכב ולפרשים¹⁰ ועתה המבלעדי יהוה עליתי על הארץ הזאת להשחיתה יהוה אמר אלי עלה אל הארץ הזאת והשחיתה¹¹ ויאמר אליקים ושבנא ויואח אל רב שקה דבר נא אל עבדיך ארמית כי שמעים אנחנו ואל תדבר אלינו יהודית באזני העם אשר על החומה¹² ויאמר רב שקה האל אדניך ואליך שלחני אדני לדבר את הדברים האלה הלא על האנשים הישבים על החומה לאכל את **הראיהם צואתם** ולשתות את **שיניהם מימי רגליהם** עמכם¹³ ויעמד רב שקה ויקרא בקול גדול יהודית ויאמר שמעו את דברי המלך הגדול מלך אשור¹⁴ כה אמר המלך אל ישא לכם חזקיהו כי לא יוכל להציל אתכם¹⁵ ואל

האלהים לבדך לכל ממלכות הארץ אתה עשית את השמים ואת הארץ¹⁷ הטה יהוה אזנך ושמע פקח יהוה עינך וראה ושמע את כל דברי סנחריב אשר שלח לחרף אלהים חי¹⁸ אמנם יהוה החריבו מלכי אשור את כל הארצות ואת ארצם¹⁹ ונתן את אלהיהם באש כי לא אלהים המה כי אם מעשה ידי אדם עץ ואבן ויאבדום²⁰ ועתה יהוה אלהינו הושיענו מידו¹ וידעו כל ממלכות הארץ כי אתה יהוה לבדך²¹ וישלח ישעיהו בן אמוץ אל חזקיהו לאמר כה אמר יהוה אלהי ישראל אשר התפללת אלי אל סנחריב מלך אשור²² זה הדבר אשר דבר יהוה עליו בזה לך לעגה לך בתולת בת ציון אחר־ך ראש הניעה בת ירושלים²³ את מי חרפת וגדפת ועל מי הרימותה קול ותשא מרום עיניך אל קדוש ישראל²⁴ ביד עבדיך חרפת אדני ותאמר ברב רכבי אני עליתי מרום הרים ירכתי לבנון ואכרת קומת ארזיו מבחר ברשיו ואבוא מרום קצו יער כרמלו²⁵ אני קרתי ושתיתי מים ואחרב בכף פעמי כל יארי מצור²⁶ הלוא שמעת למרחוק אותה עשיתי מימי קדם ויצרתי עתה הבאתיה ותהי להשאות גלים נצים ערים בצרות²⁷ וישביהן קצרי יד חתו ובשו היו עשב שדה וירק דשא חציר

ישמע יהוה אלהיך את דברי רב שקה אשר שלחו מלך אשור אדניו לחרף אלהים חי והוכיח בדברים אשר שמע יהוה אלהיך ונשאת תפלה בעד השארית הנמצאה⁵ ויבאו עבדי המלך חזקיהו אל ישעיהו⁶ ויאמר אליהם ישעיהו כה תאמרון אל אדניכם כה אמר יהוה אל תירא מפני הדברים אשר שמעת אשר גדפו נערי מלך אשור אותי⁷ הנני נותן בו רוח ושמע שמועה ושב אל ארצו והפלתיו בחרב בארצו⁸ וישב רב שקה וימצא את מלך אשור נלחם על לבנה כי שמע כי נסע מלכיש⁹ וישמע על תרהקה מלך כוש לאמר יצא להלחם אתך וישמע וישלח מלאכים אל חזקיהו לאמר¹⁰ כה תאמרון אל חזקיהו מלך יהודה לאמר אל ישאך אלהיך אשר אתה בוטח בו לאמר לא תנתן ירושלים ביד מלך אשור¹¹ הנה אתה שמעת אשר עשו מלכי אשור לכל הארצות להחרים ואתה תנצל¹² ההצילו אותם אלהי הגוים אשר השחיתו אבותי את גוזן ואת חרן ורצף ובני עדן אשר בתלשר¹³ איה מלך חמת ומלך ארפד ומלך לעיר ספרוים הנע ועוה¹⁴ ויקח חזקיהו את הספרים מיד המלאכים ויקראהו ויעל בית יהוה ויפרשהו חזקיהו לפני יהוה¹⁵ ויתפלל חזקיהו אל יהוה לאמר¹⁶ יהוה צבאות אלהי ישראל ישב הכרבים אתה הוא

1 BHS has been faithful to the Leningrad Codex where there might be a question of the validity of the form and we keep the same form as BHS.

38 בימים ההם חלה חזקיהו למות
 ויבוא אליו ישעיהו בן אמוץ הנביא ויאמר
 אליו כה אמר יהוה צו לביתך כי מת
 אתה ולא תחיה² ויסב חזקיהו פניו אל
 הקיר ויתפלל אל יהוה³ ויאמר אנה יהוה
 זכר נא את אשר התהלכתי לפניך באמת
 ובלב שלם והטוב בעיניך עשיתי ויבך
 חזקיהו בכי גדול⁴ ויהי דבר יהוה
 אל ישעיהו לאמר⁵ הלוך ואמרת אל
 חזקיהו כה אמר יהוה אלהי דוד אביך
 שמעתי את תפלתך ראיתי את דמעתיך
 הנני יוסף על ימך חמש עשרה
 שנה⁶ ומכף מלך אשור אצילך ואת העיר
 הזאת וגנותי על העיר הזאת⁷ וזה לך
 האות מאת יהוה אשר יעשה יהוה את
 הדבר הזה אשר דבר⁸ הנני משיב את צל
 המעלות אשר ירדה במעלות אחז
 בשמש אחרנית עשר מעלות ותשב
 השמש עשר מעלות במעלות אשר
 ירדה⁹ מכתב לחזקיהו מלך יהודה
 בחלתו ויחי מחליו¹⁰ אני אמרתי בדמי
 ימי אלכה בשערי שאול פקדתי יתר
 שנותי¹¹ אמרתי לא אראה יה יה בארץ
 החיים לא אביט אדם עוד עם יושבי
 חדל¹² דורי נסע ונגלה מני כאהל רעי
 קפדתי כארג חיי מדלה יבצעני מיום עד
 לילה תשלימני¹³ שויתי עד בקר כארי כן
 ישבר כל עצמותי מיום עד לילה
 תשלימני¹⁴ כסוס עגור כן אצפצף אהגה

גגות ושדמה לפני קמה²⁸ ושבתיך וצאתך
 ובואך ידעתי ואת התרגוז אלי²⁹ יען
 התרגוז אלי ושאנך עלה באזני ושמתי
 חחי באפך ומתגי בשפתיך והשיבתיך
 בדרך אשר באת בה³⁰ וזה לך האות
 אכול השנה ספיח ובשנה השנית שחיס
 ובשנה השלישית זרעו וקצרו ונטעו
 כרמים ואכול ואכלו פרים³¹ ויספה פליטת
 בית יהודה הנשארה שרש למטה ועשה
 פרי למעלה³² כי מירושלם תצא שארית
 ופליטה מהר ציון קנאת יהוה צבאות
 תעשה זאת³³ לכן כה אמר יהוה
 אל מלך אשור לא יבוא אל העיר הזאת
 ולא יורה שם חץ ולא יקדמנה מגן ולא
 ישפך עליה¹ סללה³⁴ בדרך אשר בא בה
 ישוב ואל העיר הזאת לא יבוא נאם
 יהוה³⁵ וגנותי על העיר הזאת להושיעה
 למעני ולמען דוד עבדי³⁶ ויצא
 מלאך יהוה ויכה במחנה אשור מאה
 ושמנים וחמשה אלף וישכימו בבקר
 והנה כלם פגרים מתים³⁷ ויסע וילך וישב
 סנחריב מלך אשור וישב בנינוה³⁸ ויהי
 הוא משתחוה בית נסרך אלהיו ואדרמלך
 ושראצר בניו הכהו בחרב והמה נמלטו
 ארץ אררט וימלך אסר חדן בנו
 תחתיו³

1 BHS has been faithful to the Leningrad Codex where there might be a question of the validity of the form and we keep the same form as BHS.

הראיתים באוצרתי⁵ ויאמר ישעיהו אל
 חזקיהו שמע דבר יהוה צבאות⁶ הנה
 ימים באים ונשא כל אשר בביתך ואשר
 אצרו אבתיך עד היום הזה בבל לא יותר
 דבר אמר יהוה⁷ ומבניך אשר יצאו ממך
 אשר תוליד יקחו והיו סריסים בהיכל
 מלך בבל⁸ ויאמר חזקיהו אל ישעיהו
 טוב דבר יהוה אשר דברת ויאמר כי
 יהיה שלום ואמת בימי פ

40 נחמו נחמו עמי יאמר

אלהיכם² דברו על לב ירושלם וקראו
 אליה כי מלאה צבאה כי נרצה עונה כי
 לקחה מיד יהוה כפלים בכל
 חטאתיה³ קול קורא במדבר פנו
 דרך יהוה ישרו בערבה מסלה
 לאלהינו⁴ כל גיא ינשא וכל הר וגבעה
 ישפלו והיה העקב למישור והרכסים
 לבקעה⁵ ונגלה כבוד יהוה וראו כל בשר
 יחדו כי פי יהוה דבר⁶ קול אמר
 קרא ואמר מה אקרא כל הבשר חציר
 וכל חסדו כציץ השדה⁷ יבש חציר נבל
 ציץ כי רוח יהוה נשבה בו אכן חציר
 העם⁸ יבש חציר נבל ציץ ודבר אלהינו
 יקום לעולם⁹ על הר גבה עלי לך
 מבשרת ציון הרימי בכח קולך מבשרת
 ירושלם הרימי אל תיראי אמרי לערי
 יהודה הנה אלהיכם¹⁰ הנה אדני יהוה
 בחזק יבוא וזרעו משלה לו הנה שכרו

כיונה דלו עיני למרום אדני עשקה לי
 ערבני¹⁵ מה אדבר ואמר לי והוא עשה
 אדדה כל שנותי על מר נפשי¹⁶ אדני
 עליהם יחיו ולכל בהן חיי רוחי ותחלימני
 והחיני¹⁷ הנה לשלום מר לי מר ואתה
 חשקת נפשי משחת בלי כי השלכת
 אחרי גוך כל חטאי¹⁸ כי לא שאול תודך
 מות יהללך לא ישברו יורדי בור אל
 אמתך¹⁹ חי חי הוא יודך כמוני היום אב
 לבנים יודיע אל אמתך²⁰ יהוה להושיעני
 ונגנותי נגנן כל ימי חיינו על בית
 יהוה²¹ ויאמר ישעיהו ישאו דבלת תאנים
 וימרחו על השחין ויחי²² ויאמר חזקיהו
 מה אות כי אעלה בית יהוה

39 בעת ההוא שלח מרדך בלאדן בן
 בלאדן מלך בבל ספרים ומנחה אל
 חזקיהו וישמע כי חלה ויחזק² וישמח
 עליהם חזקיהו ויראם את בית **נכתה נכתו**
 את הכסף ואת הזהב ואת הבשמים ואת
 השמן הטוב ואת כל בית כליו ואת כל
 אשר נמצא באצרתיו לא היה דבר אשר
 לא הראם חזקיהו בביתו ובכל
 ממשלתו³ ויבא ישעיהו הנביא אל המלך
 חזקיהו ויאמר אליו מה אמרו האנשים
 האלה ומאין יבאו אליך ויאמר חזקיהו
 מארץ רחוקה באו אלי מבבל⁴ ויאמר
 מה ראו בביתך ויאמר חזקיהו את כל
 אשר בביתי ראו לא היה דבר אשר לא

ותדבר ישראל נסתרה דרכי מיהוה
ומאלהי משפטי יעבור²⁸ הלוא ידעת אם
לא שמעת אלהי עולם יהוה בורא קצות
הארץ לא ייעף ולא ייגע אין חקר
לתבונתו²⁹ נתן ליעף כח ולאין אונים
עצמה ירבה³⁰ ויעפו נערים ויגעו ובחורים
כשול יכשלו³¹ וקוי יהוה יחליפו כח יעלו
אבר כנשרים ירוצו ולא ייגעו ילכו ולא
ייעפו פ

41 החרישו אלי איים ולאמים יחליפו
כח יגשו אז ידברו יחדו למשפט
נקרבה² מי העיר ממזרח צדק יקראהו
לרגלו יתן לפניו גוים ומלכים ירד יתן
כעפר חרבו כקש נדף קשתו³ ירדפם
יעבור שלום ארח ברגליו לא יבוא⁴ מי
פעל ועשה קרא הדרות מראש אני יהוה
ראשון ואת אחרנים אני הוא⁵ ראו איים
וייראו קצות הארץ יחרדו קרבו
ויאתיון⁶ איש את רעהו יעזרו ולאחיו
יאמר חזק⁷ ויחזק חרש את צרף מחליק
פטיש את הולם פעם אמר לדבק טוב
הוא ויחזקהו במסמרים לא
ימוט ׀⁸ ואתה ישראל עבדי יעקב
אשר בחרתיך זרע אברהם אהבי⁹ אשר
החזקתיך מקצות הארץ ומאציליה
קראתיך ואמר לך עבדי אתה בחרתיך
ולא מאסתיך¹⁰ אל תירא כי עמך אני אל
תשתע כי אני אלהיך אמצתיך אף

אתו ופעלתו לפניו¹¹ כרעה עדרו ירעה
בזרעו יקבץ טלאים ובחיקו ישא עלות
ינהל ׀¹² מי מדד בשעלו מים ושמים
בזרת תכן וכל בשלש עפר הארץ ושקל
בפלס הרים וגבעות במאזנים¹³ מי תכן
את רוח יהוה ואיש עצתו יודיענו¹⁴ את
מי נועץ ויבינהו וילמדהו בארח משפט
וילמדהו דעת ודרך תבונות יודיענו¹⁵ הן
גוים כמר מדלי וכשחק מאזנים נחשבו הן
איים כדק יטול¹⁶ ולבנון אין די בער
וחיתו אין די עולה ׀¹⁷ כל הגוים כאין
נגדו מאפס ותהו נחשבו לו¹⁸ ואל מי
תדמיון אל ומה דמות תערכו לו¹⁹ הפסל
נסך חרש וצרף בזהב ירקענו ורתקות
כסף צורף²⁰ המסכן תרומה עץ לא ירקב
יבחר חרש חכם יבקש לו להכין פסל לא
ימוט²¹ הלוא תדעו הלוא תשמעו הלוא
הגד מראש לכם הלוא הבינתם מוסדות
הארץ²² הישב על חוג הארץ וישביה
כחגבים הנוטה כדק שמים וימתחם
כאהל לשבת²³ הנותן רוזנים לאין שפטי
ארץ כתהו עשה²⁴ אף בל נטעו אף בל
זרעו אף בל שרש בארץ גזעם וגם נשף
בהם ויבשו וסערה בקש
תשאם ׀²⁵ ואל מי תדמיוני ואשוח
יאמר קדוש²⁶ שאו מרום עיניכם וראו מי
ברא אלה המוציא במספר צבאם לכלם
בשם יקרא מרב אונים ואמיץ כח איש
לא נעדר ׀²⁷ למה תאמר יעקב

אף תיטיבו ותרעו ונשתעה ^{ונרא} ונראה
 יחדו ²⁴ הן אתם מאין ופעלכם מאפע
 תועבה יבחר בכם ²⁵ העירותי מצפון ויאת
 ממזרח שמש יקרא בשמי ויבא סגנים
 כמו חמר וכמו יוצר ירמס טיט ²⁶ מי הגיד
 מראש ונדעה ומלפנים ונאמר צדיק אף
 אין מגיד אף אין משמיע אף אין שמע
 אמריכם ²⁷ ראשון לציון הנה הנם
 ולירושלם מבשר אתן ²⁸ וארא ואין איש
 ומאלה ואין יועץ ואשאלם וישיבו
 דבר ²⁹ הן כלם און אפס מעשיהם רוח
 ותהו נסכיהם פ

42 הן עבדי אתמך בו בחירי רצתה
 נפשי נתתי רוחי עליו משפט לגוים
 יוציא ² לא יצעק ולא ישא ולא ישמיע
 בחוץ קולו ³ קנה רצון לא ישבור ופשתה
 כהה לא יכבנה לאמת יוציא משפט ⁴ לא
 יכהה ולא ירוץ עד ישים בארץ משפט
 ולתורתו איים ייחילו פ
⁵ כה אמר האל יהוה בורא השמים
 ונוטיהם רקע הארץ וצאצאיה נתן נשמה
 לעם עליה ורוח להלכים בה ⁶ אני יהוה
 קראתיך בצדק ואחזק בידך ואצרך
 ואתנך לברית עם לאור גוים ⁷ לפקח
 עינים עורות להוציא ממסגר אסיר מבית
 כלא ישובי חשך ⁸ אני יהוה הוא שמי
 וכבודי לאחר לא אתן ותהלתי

עזרתך אף תמכתך בימין צדקי ¹¹ הן
 יבשו ויכלמו כל הנחרים בך יהיו כאין
 ויאבדו אנשי ריבך ¹² תבקשם ולא
 תמצאם אנשי מצתך יהיו כאין וכאפס
 אנשי מלחמתך ¹³ כי אני יהוה אלהיך
 מחזיק ימינך האמר לך אל תירא אני
 עזרתך פ ¹⁴ אל תיראי תולעת יעקב
 מתי ישראל אני עזרתך נאם יהוה וגאלך
 קדוש ישראל ¹⁵ הנה שמתך למורג חרוץ
 חדש בעל פיפיות תדוש הרים ותדק
 וגבעות כמץ תשים ¹⁶ תזרם ורוח תשאם
 וסערה תפיץ אותם ואתה תגיל ביהוה
 בקדוש ישראל תתהלל פ
¹⁷ העניים והאביונים מבקשים מים ואין
 לשונם בצמא נשתה אני יהוה אענם
 אלהי ישראל לא אעזבם ¹⁸ אפתח על
 שפיים נהרות ובתוך בקעות מעינות
 אשים מדבר לאגם מים וארץ ציה
 למוצאי מים ¹⁹ אתן במדבר ארו שטה
 והדס ועץ שמן אשים בערבה ברוש
 תדהר ותאשור יחדו ²⁰ למען יראו וידעו
 וישימו וישכילו יחדו כי יד יהוה עשתה
 זאת וקדוש ישראל בראה פ
²¹ קרבו ריבכם יאמר יהוה הגישו
 עצמותיכם יאמר מלך יעקב ²² יגישו
 ויגידו לנו את אשר תקרינה הראשנות
 מה הנה הגידו ונשימה לבנו ונדעה
 אחריתן או הבאות השמיענו ²³ הגידו
 האתיות לאחור ונדעה כי אלהים אתם

בתורים כלם ובבתי כלאים התבאו היו
 לבז ואין מציל משסה ואין אמר
 השב²³ מי בכס יאזין זאת יקשב וישמע
 לאחור²⁴ מי נתן **למשושה** למשסה^k יעקב
 וישראל לבזים הלוא יהוה זו חטאנו לו
 ולא אבו בדרכיו הלודך ולא שמעו
 בתורתו²⁵ וישפך עליו חמה אפו ועזוז
 מלחמה ותלהטהו מסביב ולא ידע
 ותבער בו ולא ישים על לב פ

43 ועתה כה אמר יהוה בראך יעקב
 ויצרך ישראל אל תירא כי גאלתיך
 קראתי בשמך לי אתה² כי תעבר במים
 אתך אני ובנהרות לא ישטפוך כי תלך
 במו אש לא תכוה ולהבה לא תבער
 בך³ כי אני יהוה אלהיך קדוש ישראל
 מושיעך נתתי כפרך מצרים כוש וסבא
 תחתיך⁴ מאשר יקרת בעיני נכבדת ואני
 אהבתיך ואתן אדם תחתיך ולאמים תחת
 נפשך⁵ אל תירא כי אתך אני ממזרח
 אביא זרעך וממערב אקבצך⁶ אמר
 לצפון תני ולתימן אל תכלאי הביאי בני
 מרחוק ובנותי מקצה הארץ⁷ כל הנקרא
 בשמי ולכבודי בראתיו יצרתיו אף
 עשיתיו⁸ הוציא עם עור ועינים יש
 וחרשים ואזנים למו⁹ כל הגוים נקבצו
 יחדו ויאספו לאמים מי בהם יגיד זאת

k We read one or more consonants in L differently from BHS.

לפסילים⁹ הראשנות הנה באו וחדשות
 אני מגיד בטרם תצמחנה אשמיע¹
 אתכם פ
¹⁰ שירו ליהוה שיר חדש תהלתו מקצה
 הארץ יורדי הים ומלאו איים
 וישביהם¹¹ ישאו מדבר ועריו חצרים
 תשב קדר ירנו ישבי סלע מראש הרים
 יצוחו¹² ישימו ליהוה כבוד ותהלתו
 באיים יגידו¹³ יהוה כגבור יצא כאיש
 מלחמות יעיר קנאה יריע אף יצריח על
 איביו יתגבר ס¹⁴ החשיתי מעולם
 אחריש אתאפק כיולדה אפעה אשם
 ואשאף יחד¹⁵ אחריב הרים וגבעות וכל
 עשבם אוביש ושמתי נהרות לאיים
 ואגמים אוביש¹⁶ והולכתי עורים בדרך
 לא ידעו בנתיבות לא ידעו אדריכם אשים
 מחשך לפניהם לאור ומעקשים למישור
 אלה הדברים עשיתם ולא עזבתים¹⁷ נסגו
 אחור יבשו בשת הבטחים בפסל
 האמרים למסכה אתם
 אלהינו ס¹⁸ החרשים שמעו והעורים
 הביטו לראות¹⁹ מי עור כי אם עבדי
 וחרש כמלאכי אשלח מי עור כמשלם
 ועור כעבד יהוה²⁰ **ראית** **ראות** רבות ולא
 תשמר פקוח אזנים ולא ישמע²¹ יהוה
 חפץ למען צדקו יגדיל תורה
 ויאדיר²² והוא עם בזוז ושסוי הפח

1 BHS has been faithful to the Leningrad Codex where there might be a question of the validity of the form and we keep the same form as BHS.

בעונתיך ²⁵ אֲנִי אֲנִי הוּא מַחַה
 פִּשְׁעֶיךָ לְמַעַנִי וַחֲטָאתֶיךָ לֹא
 אֶזְכֵּר ²⁶ הַזְכִּירְנִי נִשְׁפֹּטָה יַחַד סֵפֶר אֶתָּה
 לְמַעַן תִּצְדַּק ²⁷ אֲבִיךָ הַרְאֵשׁוֹן חֲטָא
 וּמְלִיצִיךָ פִּשְׁעוֹ בִּי ²⁸ וְאַחֲלַל שְׂרֵי קֹדֶשׁ
 וְאַתָּנָה לְחָרֶם יַעֲקֹב וְיִשְׂרָאֵל
 לְגְדוּפִים

44 וְעַתָּה שִׁמְעַתָּה יַעֲקֹב עַבְדֵי וְיִשְׂרָאֵל

בַּחֲרַתִּי בּוֹ ² כֹּה אָמַר יְהוָה עֲשֵׂךְ וַיִּצְרַךְ
 מִבְּטָן יַעֲזֹרֶךְ אֶל תִּירָא עַבְדֵי יַעֲקֹב וַיִּשְׁרוּן
 בַּחֲרַתִּי בּוֹ ³ כִּי אֶצֶק מִים עַל צִמָּא וְנֹזְלִים
 עַל יְבֵשָׁה אֶצֶק רוּחִי עַל זֶרְעֶךָ וּבִרְכַתִּי עַל
 צֶאֱצֵאֶיךָ ⁴ וְצִמְחוּ בִּבְיַן חֲצִיר כַּעֲרָבִים עַל
 יְבֵלֵי מִים ⁵ זֶה יֹאמֵר לִיהוָה אֲנִי זֶה יִקְרָא
 בְּשֵׁם יַעֲקֹב זֶה יִכְתֹּב יְדוֹ לִיהוָה וּבְשֵׁם
 יִשְׂרָאֵל יִכְנֶה ⁶ כֹּה אָמַר יְהוָה מֶלֶךְ יִשְׂרָאֵל וּגְאֹלוֹ יְהוָה
 צְבָאוֹת אֲנִי רֹאשׁוֹן וְאֲנִי אַחֲרוֹן וּמִבְּלַעְדֵי
 אֵין אֱלֹהִים ⁷ וּמִי כִּמוֹנִי יִקְרָא וַיִּגִּידָה
 וַיַּעֲרֹכָה לִי מִשׁוּמֵי עַם עוֹלָם וְאַתִּיּוֹת וְאִשֶׁר
 תִּבְאֲנָה יִגִּידוּ לָמוֹ ⁸ אֶל תִּפְחָדוּ וְאֶל תִּרְהוּ
 הֲלֹא מֵאִזְ הִשְׁמַעְתִּיךָ וְהַגְדַּתִּי וְאַתֶּם עַדִּי
 הִישׁ אֱלוֹהַּ מִבְּלַעְדֵי וְאֵין צוֹר בַּל
 יִדְעֵתִי ⁹ יִצְרִי פֶסֶל כֹּלֶם תְּהוּ וְחַמּוּדֵיהֶם בַּל
 יוֹעִילוּ וְעַדִּיהֶם הֵמָּה ⁴ בַּל יִרְאוּ וּבַל יִדְעוּ
 לְמַעַן יִבְשׁוּ ¹⁰ מִי יִצֵּר אֶל וּפֶסֶל נִסְךְ לְבַלְתִּי

וְרֹאשׁוֹת יִשְׁמִיעֵנוּ יִתְּנוּ עֲדֵיהֶם וַיִּצְדְּקוּ
 וַיִּשְׁמְעוּ וַיֹּאמְרוּ אִמֵּת ¹⁰ אַתֶּם עַדִּי נֹאֵם
 יְהוָה וְעַבְדֵי אֲשֶׁר בַּחֲרַתִּי לְמַעַן תִּדְעוּ
 וְתִאֲמִינוּ לִי וְתִבִּינוּ כִּי אֲנִי הוּא לִפְנֵי לֹא
 נֹוצֵר אֶל וְאַחֲרֵי לֹא יְהִיָּה ¹¹ אֲנִי
 אֲנִי יְהוָה וְאֵין מִבְּלַעְדֵי מוֹשִׁיעַ ¹² אֲנִי
 הַגְדַּתִּי וְהוֹשַׁעְתִּי וְהִשְׁמַעְתִּי וְאֵין בְּכֶם זֶר
 וְאַתֶּם עַדִּי נֹאֵם יְהוָה וְאֲנִי אֶל ¹³ גַּם מִיּוֹם
 אֲנִי הוּא וְאֵין מִיּוֹם מִצִּיל אֶפְעַל וּמִי
 יִשִּׁיבָנָה ¹⁴ כֹּה אָמַר יְהוָה גְּאֹלְכֶם
 קֹדֶשׁ יִשְׂרָאֵל לְמַעַנְכֶם שְׁלַחְתִּי בַבְּלָה
 וְהוֹרַדְתִּי בְּרִיחִים כֹּלֶם וּכְשָׁדִים בְּאֲנִיּוֹת
 רִנְתֶּם ¹⁵ אֲנִי יְהוָה קֹדֶשְׁכֶם בּוֹרָא יִשְׂרָאֵל
 מִלְּכֶכֶם ¹⁶ כֹּה אָמַר יְהוָה הַנּוֹתֵן בֵּים
 דֶּרֶךְ וּבְמִים עֲזִים נְתִיבָה ¹⁷ הַמוֹצִיא רֶכֶב
 וְסוֹס חֵיל וְעֲזוּז יַחֲדוּ יִשְׁכְּבוּ בַל יִקּוּמוּ
 דַּעְכוּ כַּפְשֶׁתָּה כְּבוֹ ¹⁸ אֶל תִּזְכְּרוּ רֹאשׁוֹת
 וּקְדַמְנִיּוֹת אֶל תִּתְבַּנְּנוּ ¹⁹ הַנְּנִי עֲשֵׂה חֲדָשָׁה
 עַתָּה תִּצְמַח הַלּוֹא תִדְעוּהָ אֶף אֲשִׁים
 בְּמַדְבַּר דֶּרֶךְ בִּישְׁמוֹן נְהָרוֹת ²⁰ תִּכְבַּדְנִי
 חֵית הַשָּׂדֶה תִּנְיָם וּבְנֹת יַעֲנָה כִּי נִתְּתִי
 בְּמַדְבַּר מִים נְהָרוֹת בִּישִׁימָן לְהַשְׁקוֹת עַמִּי
 בַּחֲרִירִי ²¹ עַם זֶה יִצְרַתִּי לִי תִהְלֵתִי
 יִסְפְּרוּ ²² וְלֹא אֶתִּי קִרְאֵת יַעֲקֹב כִּי
 יִגַּעַת בִּי יִשְׂרָאֵל ²³ לֹא הִבִּיאֵת לִי שֶׁהָ
 עֲלֵתֶיךָ זֹבַחֶיךָ לֹא כִבַּדְתִּנִּי לֹא הִעֲבַדְתֶּיךָ
 בְּמִנְחָה וְלֹא הוֹגַעְתֶּיךָ בְּלִבּוֹנָה ²⁴ לֹא קִנִּיתִי
 לִי בְּכֶסֶף קִנְיָה וְחֵלֶב זֹבַחֶיךָ לֹא הִרְוִיתִנִּי
 אֶךְ הִעֲבַדְתִּנִּי בְּחֲטָאוֹתֶיךָ הוֹגַעְתִּנִּי

4 Puncta extraordinaria -- a ⁴ is used to mark such marks in the text when they are above the line and a ⁵ when they are below the line.

שמים כי עשה יהוה הריעו תחתיות ארץ
 פצחו הרים רנה יער וכל עץ בו כי גאל
 יהוה יעקב ובישראל יתפאר פ
²⁴ כה אמר יהוה גאלך ויצרך מבטן אנכי
 יהוה עשה כל נטה שמים לבדי רקע
 הארץ מי אתי מאתי ²⁵ מפר אתות בדים
 וקסמים יהולל משיב חכמים אחור
 ודעתם ישכל ²⁶ מקים דבר עבדו ועצת
 מלאכיו ישלים האמר לירושלם תושב
 ולערי יהודה תבנינה וחרבותיה
 אקומם ²⁷ האמר לצולה חרבי ונהרתיך
 אוביש ²⁸ האמר לכורש רעי וכל חפצי
 ישלם ולאמר לירושלם תבנה והיכל
 תוסד ס

45 כה אמר יהוה למשיחו לכורש אשר
 החזקתי בימינו לרד לפניו גוים ומתני
 מלכים אפתח לפתח לפניו דלתים
 ושערים לא יסגרו ² אני לפניך אלך
 והדורים אושר אישר דלתות נחושה אשבר
 ובריחי ברזל אגדע ³ ונתתי לך אוצרות
 חשך ומטמני מסתרים למען תדע כי אני
 יהוה הקורא בשמך אלהי ישראל ⁴ למען
 עבדי יעקב וישראל בחירי ואקרא לך
 בשמך אכנך ולא ידעתני ⁵ אני יהוה ואין
 עוד זולתי אין אלהים אאזרך ולא
 ידעתני ⁶ למען ידעו ממזרח שמש
 וממערבה ^p כי אפס בלעדי אני יהוה ואין

הועיל ¹¹ הן כל חבריו יבשו וחרשים המה
 מאדם יתקבצו כלם יעמדו יפחדו יבשו
 יחד ¹² חרש ברזל מעצד ופעל בפחם
 ובמקבות יצרהו ויפעלהו בזרוע כחו גם
 רעב ואין כח לא שתה מים וייעף ¹³ חרש
 עצים נטה קו יתארהו בשרד יעשהו
 במקצעות ובמחוגה יתארהו ויעשהו
 כתבנית איש כתפארת אדם לשבת
 בית ¹⁴ לכרת לו ארזים ויקח תרזה ואלון
 ויאמץ לו בעצי יער נטע ארן וגשם
 יגדל ¹⁵ והיה לאדם לבער ויקח מהם ויחם
 אף ישיק ואפה לחם אף יפעל אל
 וישתחו עשהו פסל ויסגד למו ¹⁶ חציו
 שרף במו אש על חציו בשר יאכל יצלה
 צלי וישבע אף יחם ויאמר האח חמותי
 ראיתי אור ¹⁷ ושאריתו לאל עשה לפסלו
 יסגוד יסגד לו וישתחו ויתפלל אליו ויאמר
 הצילני כי אלי אתה ¹⁸ לא ידעו ולא יבינו
 כי טח מראות עיניהם מהשכיל
 לבתם ¹⁹ ולא ישיב אל לבו ולא דעת ולא
 תבונה לאמר חציו שרפתי במו אש ואף
 אפיתי על גחליו לחם אצלה בשר ואכל
 ויתרו לתועבה אעשה לבול עץ
 אסגוד ²⁰ רעה אפר לב הותל הטהו ולא
 יציל את נפשו ולא יאמר הלוא שקר
 בימיני ס ²¹ זכר אלה יעקב וישראל כי
 עבדי אתה יצרתך עבד לי אתה ישראל
 לא תנשני ²² מחיתי כעב פשעך וכענן
 חטאותיך שובה אלי כי גאלתיך ²³ רנו

p We read punctuation in L differently from BHS.

¹⁸ כי כה אמר יהוה בורא השמים הוא האלהים יצר הארץ ועשה הוא כוננה לא תהו בראה לשבת יצרה אני יהוה ואין עוד ¹⁹ לא בסתר דברתי במקום ארץ חשך לא אמרתי לזרע יעקב תהו בקשוני אני יהוה דבר צדק מגיד מישרים ²⁰ הקבצו ובאו התנגשו יחדו פליטי הגוים לא ידעו הנשאים את עץ פסלם ומתפללים אל אל לא יושיע ²¹ הגידו והגישו אף יועצו יחדו מי השמיע זאת מקדם מאז הגידה הלוא אני יהוה ואין עוד אלהים מבלעדי אל צדיק ומושיע אין זולתי ²² פנו אלי והושעו כל אפסי ארץ כי אני אל ואין עוד ²³ בי נשבעתי יצא מפי צדקה דבר ולא ישוב כי לי תכרע כל ברך תשבע כל לשון ²⁴ אך ביהוה לי אמר צדקות ועז עדיו יבוא ויבשו כל הנחרים בו ²⁵ ביהוה יצדקו ויתהללו כל זרע ישראל

46 כרע בל קרס נבו היו עצביהם לחיה ולבהמה נשאתיכם עמוסות משא לעיפה ² קרסו כרעו יחדו לא יכלו מלט משא ונפשם בשבי הלכה ³ שמעו אלי בית יעקב וכל שארית בית ישראל העמסים מני בטן הנשאים מני רחם ⁴ ועד זקנה אני הוא ועד שיבה ¹ אני אסבל אני

עוד ⁷ יוצר אור ובורא חשך עשה שלום ובורא רע אני יהוה עשה כל אלה ⁸ הרעיפו שמים ממעל ושחקים יזלו צדק תפתח ארץ ויפרו ישע וצדקה תצמיח יחד אני יהוה בראתיו ⁹ הוי רב את יצרו חרש את חרשי אדמה היאמר ^c חמר ליצרו מה תעשה ופעלך אין ידיים לו ¹⁰ הוי אמר לאב מה תוליד ולאשה מה תחילין ¹¹ כה אמר יהוה קדוש ישראל ויצרו האתיות שאלוני על בני ועל פעל ידי תצוני ¹² אנכי עשיתי ארץ ואדם עליה בראתי אני ידי נטו שמים וכל צבאם צויתי ¹³ אנכי העירתהו בצדק וכל דרכיו אישר הוא יבנה עירי וגלותי ישלח לא במחיר ולא בשחד אמר יהוה צבאות ^פ

¹⁴ כה אמר יהוה יגיע מצרים וסחר כוש וסבאים אנשי מדה עליך יעברו ולך יהיו אחרריך ילכו בזקים יעברו ואלך ישתחוו ¹ אליך יתפללו אך בך אל ואין עוד אפס אלהים ¹⁵ אכן אתה אל מסתתר אלהי ישראל מושיע ¹⁶ בושו וגם נכלמו כלם יחדו הלכו בכלמה חרשי צירים ¹⁷ ישראל נושע ביהוה תשועת עולמים לא תבשו ולא תכלמו עד עולמי עד ^פ

c We read one or more accents in L differently than BHS. Often this notation indicates a typographical error in BHS.

1 BHS has been faithful to the Leningrad Codex where there might be a question of the validity of the form and we keep the same form as BHS.

1 BHS has been faithful to the Leningrad Codex where there might be a question of the validity of the form and we keep the same form as BHS.

עשיתי ואני אשא ואני אסבל
 ואמלט ׀ ⁵ למי תדמיוני ותשוו
 ותמשלוני ונדמה ⁶ הזלים זהב מכיס וכסף
 בקנה ישקלו ישכרו צורף ויעשהו אל
 יסגדו אף ישתחוו ¹ ⁷ ישאהו על כתף
 יסבלהו ויניחהו תחתיו ויעמד ממקומו לא
 ימיש אף יצעק אליו ולא יענה מצרתו לא
 יושיענו ׀ ⁸ זכרו זאת והתאששו
 השיבו פושעים על לב ⁹ זכרו ראשנות
 מעולם כי אנכי אל ואין עוד אלהים ואפס
 כמוני ¹⁰ מגיד מראשית אחרית ומקדם
 אשר לא נעשו אמר עצתי תקום וכל
 חפצי אעשה ¹¹ קרא ממזרח עיט מארץ
 מרחק איש ^{עצתו} ^{עצתי} אף דברתי אף
 אביאנה יצרתי אף אעשנה ׀ ¹² שמעו
 אלי אבירי לב הרחוקים
 מצדקה ¹³ קרבתי צדקתי לא תרחק
 ותשועתי לא תאחר ונתתי בציון תשועה
 לישראל תפארתי ׀

47 רדי ושבי על עפר בתולת בת בבל
 שבי לארץ אין כסא בת כשדים כי לא
 תוסיפי יקראו לך רכה וענגה ² קחי רחים
 וטחני קמח גלי צמתך חשפי שבל גלי
 שוק עברי נהרות ³ תגל ערותך גם תראה
 חרפתך נקם אקח ולא אפגע
 אדם ׀ ⁴ גאלנו יהוה צבאות שמו
 אין מושיעך ׀

1 BHS has been faithful to the Leningrad Codex where there might be a question of the validity of the form and we keep the same form as BHS.

קראתיו הביאתיו והצלית דרכו ¹⁶ קרבו אלי שמעו זאת לא מראש בסתר דברתי מעת היותה שם אני ועתה אדני יהוה שלחני ורוחו פ

¹⁷ כה אמר יהוה גאלך קדוש ישראל אני יהוה אלהיך מלמדך להועיל מדריךך בדרך תלך ¹⁸ לוא הקשבת למצותי ויהי כנהר שלומך וצדקתך כגלי הים ¹⁹ ויהי כחול זרעך וצאצאי מעיך כמעתי לא יכרת ולא ישמד שמו מלפני ²⁰ צאו מבבל ברחו מכשדים בקול רנה הגידו השמיעו זאת הוציאוה עד קצה הארץ אמרו גאל יהוה עבדו יעקב ²¹ ולא צמאו בחרבות הולכים מים מצור הזיל למו ויבקע צור ויזבו מים ²² אין שלום אמר יהוה לרשעים פ

49 שמעו איים אלי והקשיבו לאמים מרחוק יהוה מבטן קראני ממעי אמי הזכיר שמי ² וישם פי כחרב חדה בצל ידו החביאני וישימני לחץ ברור באשפתו הסתירני ³ ויאמר לי עבדי אתה ישראל אשר בך אתפאר ⁴ ואני אמרתי לריק יגעתי לתהו והבל כחי כליתי אכן משפטי את יהוה ופעלתי את אלהי ⁵ ועתה אמר יהוה יצרי מבטן לעבד לו לשובב יעקב אליו וישראל ^{לא} לו יאסף ואכבד בעיני יהוה ואלהי היה עזי ⁶ ויאמר נקל מהיותך לי עבד להקים את שבטי יעקב ^{ונצירי}

48 שמעו זאת בית יעקב הנקראים בשם ישראל וממי יהודה יצאו הנשבעים בשם יהוה ובאלהי ישראל יזכירו לא באמת ולא בצדקה ² כי מעיר הקדש נקראו ועל אלהי ישראל נסמכו יהוה צבאות שמו פ ³ הראשנות מאז הגדתי ומפי יצאו ואשמיעם פתאם עשיתי ותבאנה ⁴ מדעתי כי קשה אתה וגיד ברזל ערפך ומצחך נחושה ⁵ ואגיד לך מאז בטרם תבוא השמעתך פן תאמר עצבי עשם ופסלי ונסכי צום ⁶ שמעת חזה כלה ואתם הלוא תגידו השמעתך חדשות מעתה ונצרות ולא ידעתם ⁷ עתה נבראו ולא מאז ולפני יום ולא שמעתם פן תאמר הנה ידעתין ⁸ גם לא שמעת גם לא ידעת גם מאז לא פתחה אזנך כי ידעתי בגוד תבגוד ופשע מבטן קרא לך ⁹ למען שמי אאריך אפי ותהלתי אחטם לך לבלתי הכריתך ¹⁰ הנה צרפתך ולא בכסף בחרתך בכור עני ¹¹ למעני למעני אעשה כי איך יחל וכבודי לאחר לא אתן פ ¹² שמע אלי יעקב וישראל מקראי אני הוא אני ראשון אף אני אחרון ¹³ אף ידי יסדה ארץ וימיני טפחה שמים קרא אני אליהם יעמדו יחדו ¹⁴ הקבצו כלכם ושמעו מי בהם הגיד את אלה יהוה אהבו יעשה חפצו בבבל וזרעו כשדים ¹⁵ אני אני דברתי אף

ורחקו מבלעיד²⁰ עוד יאמרו באזניך בני שכליך צר לי המקום גשה לי ואשבה²¹ ואמרת בלבבך מי ילד לי את אלה ואני שכולה וגלמודה גלה וסורה ואלה מי גדל הן אני נשארתי לבדי אלה איפה הם פ

²² כה אמר אדני יהוה הנה אשא אל גוים ידי ואל עמים ארים נסי והביאו בניך בחצן ובנתיך על כתף תנשאנה²³ והיו מלכים אמניך ושרותיהם מיניקתיך אפים ארץ ישתחוו לך ועפר רגליך ילחכו וידעת כי אני יהוה אשר לא יבשו קוי פ ²⁴ היקה מגבור מלקוח ואם שבי צדיק ימלט²⁵ כי כה אמר יהוה גם שבי גבור יקח ומלקוח עריץ ימלט ואת יריבך אנכי אריב ואת בניך אנכי אושיע²⁶ והאכלתי את מוניך את בשרם וכעסיס דמם ישכרון וידעו כל בשר כי אני יהוה מושיעך וגאלך אביר יעקב פ

50 כה אמר יהוה אי זה ספר כריתות אמכם אשר שלחתיה או מי מנושי אשר מכרתי אתכם לו הן בעונתיכם נמכרתם ובפשעיכם שלחה אמכם² מדוע באתי ואין איש קראתי^c ואין עונה הקצור קצרה ידי מפדות ואם אין בי כח להציל הן בגערתי אחריב ים אשים נהרות מדבר

c We read one or more accents in L differently than BHS. Often this notation indicates a typographical error in BHS.

ונצורי ישראל להשיב ונתתיך לאור גוים להיות ישועתי עד קצה הארץ פ ⁷ כה אמר יהוה גאל ישראל קדושו לבזה נפש למתעב גוי לעבד משלים מלכים יראו וקמו שרים וישתחוו¹ למען יהוה אשר נאמן קדש ישראל ויבחרך⁸ כה אמר יהוה בעת רצון עניתיך וביום ישועה עזרתיך ואצרך ואתנך לברית עם להקים ארץ להנחיל נחלות שממות⁹ לאמר לאסורים צאו לאשר בחשך הגלו על דרכים ירעו ובכל שפיים מרעיתם¹⁰ לא ירעבו ולא יצמאו ולא יכם שרב ושמש כי מרחמם ינהגם ועל מבועי מים ינהלם¹¹ ושמתי כל הרי לדרך ומסלתי ירמון¹² הנה אלה מרחוק יבאו והנה אלה מצפון ומים ואלה מארץ סינים¹³ רנו שמים וגילי ארץ **יפצחו** ופצחו הרים רנה כי נחם יהוה עמו ועניו ירחם פ ¹⁴ ותאמר ציון עזבני יהוה ואדני שכחני¹⁵ התשכח אשה עולה מרחם בן בטנה גם אלה תשכחנה ואנכי לא אשכחך¹⁶ הן על כפים חקתיך חומתיך נגדי תמיד¹⁷ מהרו בניך מהרסיד ומחרביך ממך יצאו¹⁸ שאי סביב עיניך וראי כלם נקבצו באו לך חי אני נאם יהוה כי כלם כעדי תלבשי ותקשרים ככלה¹⁹ כי חרבתיך ושממתיך וארץ הרסתיך כי עתה תצרי מיושב

1 BHS has been faithful to the Leningrad Codex where there might be a question of the validity of the form and we keep the same form as BHS.

עמי ולאומי אלי האזינו כי תורה מאתי
 תצא ומשפטי לאור עמים ארגיע⁵ קרוב
 צדקי יצא ישעי וזרעי עמים ישפטו אלי
 איים יקוו ואל זרעי ייחלון⁶ שאו לשמים
 עיניכם והביטו אל הארץ מתחת כי שמים
 כעשן נמלחו והארץ כבגד תבלה וישביה
 כמו כן ימותון וישועתי לעולם תהיה
 וצדקתי לא תחת⁷ שמעו אלי ידעי
 צדק עם תורתני בלבם אל תיראו חרפת
 אנוש ומגדפתם אל תחתו⁸ כי כבגד
 יאכלם עש וכצמר יאכלם סס וצדקתי
 לעולם תהיה וישועתי לדור
 דורים⁹ עורי עורי לבשי עז זרוע
 יהוה עורי כימי קדם דרות עולמים הלוא
 את היא המחצבת רהב מחוללת
 תנין¹⁰ הלוא את היא המחרבת ים מי
 תהום רבה השמה מעמקי ים דרך לעבר
 גאולים¹¹ ופדויי יהוה ישובון ובאו ציון
 ברנה ושמחת עולם על ראשם ששון
 ושמחה ישיגון נסו יגון
 ואנחה¹² אנכי אנכי הוא מנחמכם
 מי את ותיראי מאנוש ימות ומבן אדם
 חציר ינתן¹³ ותשכח יהוה עשך נוטה
 שמים ויסד ארץ ותפחד תמיד כל היום
 מפני חמת המציק כאשר כונן להשחית
 ואיה חמת המציק¹⁴ מהר צעה להפתח
 ולא ימות לשחת ולא יחסר
 לחמו¹⁵ ואנכי יהוה אלהיך רגע הים
 ויהמו גליו יהוה צבאות שמו¹⁶ ואשים

תבאש דגתם מאין מים ותמת
 בצמא³ אלביש שמים קדרות ושק אשים
 כסותם⁴ אדני יהוה נתן לי לשון
 למודים לדעת לעות את יעף דבר יעיר
 בבקר בבקר יעיר לי און לשמע
 כלמודים⁵ אדני יהוה פתח לי און ואנכי
 לא מריתי אחר לא נסוגתי⁶ גוי נתתי
 למכים ולחיי למרטים פני לא הסתרתי
 מכלמות ורק⁷ ואדני יהוה יעזר לי על כן
 לא נכלמתי על כן שמתתי פני כחלמיש
 ואדע כי לא אבוש⁸ קרוב מצדיקי מי
 יריב אתי נעמדה יחד מי בעל משפטי
 יגש אלי⁹ הן אדני יהוה יעזר לי מי הוא
 ירשיעני הן כלם כבגד יבלו עש
 יאכלם¹⁰ מי בכס ירא יהוה שמע בקול
 עבדו אשר הלך חשכים ואין נגה לו יבטח
 בשם יהוה וישען באלהיו¹¹ הן כלכם
 קדחי אש מאזרי זיקות לכו באור אשכם
 ובזיקות בערתם מידי היתה זאת לכם
 למעצבה תשכבון פ

51 שמעו אלי רדפי צדק מבקשי יהוה
 הביטו אל צור חצבתם ואל מקבת בור
 נקרתם² הביטו אל אברהם אביכם ואל
 שרה תחוללכם כי אחד קראתיו
 ואברכהו וארבהו³ כי נחם יהוה
 ציון נחם כל חרבתייה וישם מדברה כעדן
 וערבתייה כגן יהוה ששון ושמחה ימצא
 בה תודה וקול זמרה⁴ הקשיבו אלי

יהוה ותמיד כל היום שמי מנאץ⁶ לכן ידע
 עמי שמי לכן ביום ההוא כי אני הוא
 המדבר הנני⁷ מה נאוו על ההרים רגלי
 מבשר משמיע שלום מבשר טוב משמיע
 ישועה אמר לציון מלך אלהיך⁸ קול צפיד
 נשאו קול יחדו ירננו כי עין בעין יראו
 בשוב יהוה ציון⁹ פצחו רננו יחדו חרבות
 ירושלם כי נחם יהוה עמו גאל
 ירושלם¹⁰ חשף יהוה את זרוע קדשו
 לעיני כל הגוים וראו כל אפסי ארץ את
 ישועת אלהינו¹¹ סורו סורו צאו
 משם טמא אל תגעו צאו מתוכה הברו
 נשאי כלי יהוה¹² כי לא בחפזון תצאו
 ובמנוסה לא תלכוז כי הלך לפניכם יהוה
 ומאספכם אלהי ישראל¹³ הנה
 ישכיל עבדי ירום ונשא וגבה
 מאד¹⁴ כאשר שממו עליך רבים כן
 משחת מאיש מראהו ותארו מבני
 אדם¹⁵ כן יזה גוים רבים עליו יקפצו
 מלכים פיהם כי אשר לא ספר להם ראו
 ואשר לא שמעו התבוננו

53 מי האמין לשמעטנו זרוע יהוה על
 מי נגלתה² ויעל כיונק לפניו וכשרש
 מארץ ציה לא תאר לו ולא הדר ונראהו
 ולא מראה ונחמדהו³ נבזה וחדל אישים
 איש מכאבות וידוע חלי וכמסתר פנים
 ממנו נבזה ולא חשבנהו⁴ אכן חלינו הוא
 נשא ומכאבינו סבלם ואנחנו חשבנהו

דברי בפיך ובצל ידי כסיתך לנטע שמים
 וליסד ארץ ולאמר לציון עמי
 אתה¹⁷ התעוררי התעוררי קומי
 ירושלם אשר שתית מיד יהוה את כוס
 חמתו את קבעת כוס התרעלה שתית
 מצית¹⁸ אין מנהל לה מכל בנים ילדה
 ואין מחזיק בידה מכל בנים
 גדלה¹⁹ שתים הנה קראתיך מי ינוד לך
 השד והשבר והרעב והחרב מי
 אנחמד²⁰ בניך עלפו שכבו בראש כל
 חוצות כתוא מכמר המלאים חמת יהוה
 גערת אלהיך²¹ לכן שמעי נא זאת עניה
 ושכרת ולא מיין²² כה אמר אדניך
 יהוה ואלהיך יריב עמו הנה לקחתי מידך
 את כוס התרעלה את קבעת כוס חמתי
 לא תוסיפי לשתותה עוד²³ ושמתי ביד
 מוגיך אשר אמרו לנפשך שחי ונעברה
 ותשימי כארץ גוך וכחוף לעברים

52 עורי עורי לבשי עזך ציון לבשי בגדי
 תפארתך ירושלם עיר הקדש כי לא יוסיף
 יבא בך עוד ערל וטמא² התנערי מעפר
 קומי שבי ירושלם **התפתחו התפתחי** מוסרי
 צוארך שביה בת ציון³ כי כה אמר
 יהוה חנם נמכרתם ולא בכסף תגאלו⁴ כי
 כה אמר אדני יהוה מצרים ירד עמי
 בראשנה לגור שם ואשור באפס
 עשקו⁵ ועתה **מי לי מה לי** פה נאם יהוה כי
 לקח עמי חנם **משלו משליו** יהילילו נאם

תזכרי עוד⁵ כי בעליך עשיך יהוה צבאות
 שמו וגאלך קדוש ישראל אלהי כל הארץ
 יקרא⁶ כי כאשה עזובה ועצובת רוח
 קראך יהוה ואשת נעורים כי תמאס אמר
 אלהיך⁷ ברגע קטן עזבתיך וברחמים
 גדלים אקבצך⁸ בשצף קצף הסתרתני פני
 רגע ממך ובחסד עולם רחמתוך אמר
 גאלך יהוה ׀⁹ כי מי נח זאת לי אשר
 נשבעתי מעבר מי נח עוד על הארץ כן
 נשבעתי מקצף עליך ומגער בך¹⁰ כי
 ההרים ימושו והגבעות תמוטנה וחסדי
 מאתך לא ימוש וברית שלומי לא תמוט
 אמר מרחמך יהוה ׀¹¹ עניה סערה
 לא נחמה הנה אנכי מרביץ בפוך אבניך
 ויסדתיך בספירים¹² ושמתי כדכד
 שמשתיך ושעריך לאבני אקדח וכל
 גבולך לאבני חפץ¹³ וכל בניך למודי יהוה
 ורב שלום בניך¹⁴ בצדקה תכוני רחקי
 מעשק כי לא תיראי וממחתה כי לא
 תקרב אליך¹⁵ הן גור יגור אפס מאותי מי
 גר אתך עליך יפול¹⁶ הן הנה אנכי בראתי
 חרש נפח באש פחם ומוציא כלי
 למעשהו ואנכי בראתי משחית
 לחבל¹⁷ כל כלי יוצר עליך לא יצלח וכל
 לשון תקום אתך למשפט תרשיעי זאת
 נחלת עבדי יהוה וצדקתם מאתי נאם
 יהוה ׀

55 הוי כל צמא לכו למים ואשר אין לו

נגוע מכה אלהים ומענה⁵ והוא מחלל
 מפשענו מדכא מעונתינו מוסר שלומנו
 עליו ובחברתו נרפא לנו⁶ כלנו כצאן
 תעינו איש לדרכו פנינו ויהוה הפגיע בו
 את עון כלנו⁷ נגש והוא נענה ולא יפתח
 פיו כשה לטבח יובל וכרחל לפני גזייה
 נאלמה ולא יפתח פיו⁸ מעצר וממשפט
 לקח ואת דורו מי ישוחח כי נגזר מארץ
 חיים מפשע עמי נגע למו⁹ ויתן את
 רשעים קברו ואת עשיר במתיו על לא
 חמס עשה ולא מרמה בפיו¹⁰ ויהוה חפץ
 דכאו החלי אם תשים אשם נפשו יראה
 זרע יאריך ימים וחפץ יהוה בידו
 יצלח¹¹ מעמל נפשו יראה ישבע בדעתו
 יצדיק צדיק עבדי לרבים ועונתם הוא
 יסבל¹² לכן אחלק לו ברבים ואת עצומים
 יחלק שלל תחת אשר הערה למות נפשו
 ואת פשעים נמנה והוא חטא רבים נשא
 ולפשעים יפגיע ׀

54 רני עקרה לא ילדה פצחי רנה
 וצהלי לא חלה כי רבים בני שוממה מבני
 בעולה אמר יהוה² הרחיבי מקום אהלך
 ויריעות משכנותיך יטו אל תחשכי
 האריכי מיתריך ויתדתיך חזקי³ כי ימין
 ושמאול תפרצי וזרעך גוים יירש וערים
 נשמות יושיבו⁴ אל תיראי כי לא תבושי
 ואל תכלמי כי לא תחפירי כי בשת
 עלומיך תשכחי וחרפת אלמנותיך לא

56 כה אמר יהוה שמרו משפט ועשו צדקה כי קרובה ישועתי לבוא וצדקתי להגלות² אשרי אנוש יעשה זאת ובן אדם יחזיק בה שמר שבת מחללו ושמר ידו מעשות כל רע³ ואל יאמר בן הנכר הנלוה אל יהוה לאמר הבדל יבדילני יהוה מעל עמו ואל יאמר הסרים הן אני עץ יבש⁴ כי כה אמר יהוה לסריסים אשר ישמרו את שבתותי ובחרו באשר חפצתי ומחזיקים בבריתי⁵ ונתתי להם בביתי ובחומתי יד ושם טוב מבנים ומבנות שם עולם אתן לו אשר לא יכרת⁶ ובני הנכר הנלוים על יהוה לשרתו ולאהבה את שם יהוה להיות לו לעבדים כל שמר שבת מחללו ומחזיקים בבריתי⁷ והביאותים אל הר קדשי ושמחתים בבית תפלתי עולתיהם וזבחיהם לרצון על מזבחי כי ביתי בית תפלה יקרא לכל העמים⁸ נאם אדני יהוה מקבץ נדחי ישראל עוד אקבץ עליו לנקבציו⁹ כל חיתו שדי אתיו לאכל כל חיתו ביער¹⁰ צפו צפיו עורים כלם לא ידעו כלם כלבים אלמים לא יוכלו לנבח הזים שכבים אהבי לנום¹¹ והכלבים עזי נפש לא ידעו שבעה והמה רעים לא ידעו הבין כלם לדרכם פנו איש לבצעו מקצהו¹² אתיו אקחה יין ונסבאה שכר והיה כזה יום מחר גדול יתר מאד

כסף לכו שברו ואכלו ולכו שברו בלוא כסף ובלוא מחיר יין וחלב² למה תשקלו כסף בלוא לחם ויגיעכם בלוא לשבעה שמעו שמוע אלי ואכלו טוב ותתענג בדשן נפשכם³ הטו אזנכם ולכו אלי שמעו ותחי נפשכם ואכרתה לכם ברית עולם חסדי דוד הנאמנים⁴ הן עד לאומים נתתיו נגיד ומצוה לאמים⁵ הן גוי לא תדע תקרא וגוי לא ידעוך אליך ירוצו למען יהוה אלהיך ולקדוש ישראל כי פארך⁶ דרשו יהוה בהמצאו קראהו בהיותו קרוב⁷ יעזב רשע דרכו ואיש און מחשבתיו וישב אל יהוה וירחמהו ואל אלהינו כי ירבה לסלוח⁸ כי לא מחשבותי מחשבותיכם ולא דרכיכם דרכי נאם יהוה⁹ כי גבהו שמים מארץ כן גבהו דרכי מדרכיכם ומחשבתתי ממחשבתתיכם¹⁰ כי כאשר ירד הגשם והשלג מן השמים ושמה לא ישוב כי אם הרוה את הארץ והולידה והצמיחה ונתן זרע לזרע ולחם לאכל¹¹ כן יהיה דברי אשר יצא מפי לא ישוב אלי ריקם כי אם עשה את אשר חפצתי והצליח אשר שלחתיו¹² כי בשמחה תצאו ובשלום תובלון ההרים והגבעות יפצחו לפניכם רנה וכל עצי השדה ימחאו כף¹³ תחת הנעצוץ יעלה ברוש תחת ותחת הסרפד יעלה הדס והיה ליהוה לשם לאות עולם לא יכרת¹⁴

וקדוש אשכון ואת דכא ושפל רוח
 להחיות רוח שפלים ולהחיות לב
 נדכאים¹⁶ כי לא לעולם אריב ולא לנצח
 אקצוף כי רוח מלפני יעטוף ונשמות אני
 עשיתי¹⁷ בעון בצעו קצפתי ואכהו הסתר
 ואקצף וילך שובב בדרך לבו¹⁸ דרכיו
 ראיתי וארפאהו ואנחהו ואשלם נחמים
 לו ולאבליו¹⁹ בורא נוב ניב שפתים שלום
 שלום לרחוק ולקרוב אמר יהוה
 ורפאתיו²⁰ והרשעים כים נגרש כי השקט
 לא יוכל ויגרשו מימיו רפש וטיט²¹ אין
 שלום אמר אלהי לרשעים ׀

58 קרא בגרון אל תחשך כשופר הרם
 קולך והגד לעמי פשעם ולבית יעקב
 חטאתם² ואותי יום יום ידרשון ודעת
 דרכי יחפצון כגוי אשר צדקה עשה
 ומשפט אלהיו לא עזב ישאלוני משפטי
 צדק קרבת אלהים יחפצון³ למה צמנו
 ולא ראית ענינו נפשנו ולא תדע הן ביום
 צמכם תמצאו חפץ וכל עצביכם
 תנגשו⁴ הן לריב ומצה תצומו ולהכות
 באגרף רשע לא תצומו כיום להשמיע
 במרום קולכם⁵ הכזה יהיה צום אבחרהו
 יום ענות אדם נפשו הלכף כאגמן ראשו
 ושק ואפר יציע הלזה תקרא צום ויום
 רצון ליהוה⁶ הלוא זה צום אבחרהו פתח
 חרצבות רשע התר אגדות מוטה ושלח
 רצועים חפשים וכל מוטה תנתקו⁷ הלוא

57 הצדיק אבד ואין איש שם על לב
 ואנשי חסד נאספים באין מבין כי מפני
 הרעה נאסף הצדיק² יבוא שלום ינוחו
 על משכבותם הלך נכחו³ ואתם קרבו
 הנה בני עננה זרע מנאף ותזנה⁴ על מי
 תתענגו על מי תרחיבו פה תאריכו לשון
 הלוא אתם ילדי פשע זרע
 שקר⁵ הנחמים באלים תחת כל עץ רענן
 שחטי הילדים בנחלים תחת סעפי
 הסלעים⁶ בחלקי נחל חלקך הם הם
 גורלך גם להם שפכת נסך העלית מנחה
 העל אלה אנחם⁷ על הר גבה ונשא שמת
 משכבך גם שם עלית לזבח זבח⁸ ואחר
 הדלת והמזוזה שמת זכרוןך כי מאתי
 גלית ותעלי הרחבת משכבך ותכרת לך
 מהם אהבת משכבם יד חזית⁹ ותשרי
 למלך בשמן ותרבי רקחך ותשלחי צריך
 עד מרחק ותשפילי עד שאול¹⁰ ברב
 דרכך יגעת לא אמרת נואש חית ידך
 מצאת על כן לא חלית¹¹ ואת מי דאגת
 ותיראי כי תכזבי ואותי לא זכרת לא
 שמת על לבך הלא אני מחשה ומעלם
 ואותי לא תיראי¹² אני אגיד צדקתך ואת
 מעשיך ולא יועילוך¹³ בזעקך יצילך
 קבוציך ואת כלם ישא רוח יקח הבל
 והחוסה בי ינחל ארץ ויירש הר
 קדשי¹⁴ ואמר סלו סלו פנו דרך הרימו
 מכשול מדרך עמי ׀¹⁵ כי כה אמר
 רם ונשא שכן עד וקדוש שמו מרום

קרא בצדק ואין נשפט באמונה בטוח על
 תהו ודבר שוא הרו עמל והוליד
 און⁵ ביצי צפעוני בקעו וקורי עכביש
 יארגו האכל מביציהם ימות והזורה
 תבקע אפעה⁶ קוריהם לא יהיו לבגד ולא
 יתכסו במעשיהם מעשיהם מעשי און
 ופעל חמס בכפיהם⁷ רגליהם לרע ירצו
 וימהרו לשפך דם נקי מחשבותיהם
 מחשבות און שד ושבר במסלותם⁸ דרך
 שלום לא ידעו ואין משפט במעגלותם
 נתיבותיהם עקשו להם כל דרך בה לא
 ידע שלום⁹ על כן רחק משפט ממנו ולא
 תשיגנו צדקה נקוה לאור והנה חשך
 לנגהות באפלות נהלך¹⁰ נגששה כעורים
 קיר וכאין עינים נגששה כשלנו בצהרים
 כנשף באשמנים כמתים¹¹ נהמה כדבים
 כלנו וכיונים הגה נהגה נקוה למשפט ואין
 לישועה רחקה ממנו¹² כי רבו פשעינו
 נגדך וחטאותינו ענתה בנו כי פשעינו
 אתנו ועונתינו ידענום¹³ פשע וכחש
 ביהוה ונסוג מאחר אלהינו דבר עשק
 וסרה הרו והגו מלב דברי שקר¹⁴ והסג
 אחור משפט וצדקה מרחוק תעמד כי
 כשלה ברחוב אמת ונכחה לא תוכל
 לבוא¹⁵ ותהי האמת נעדרת וסר מרע
 משתולל וירא יהוה וירע בעיניו כי אין
 משפט¹⁶ וירא כי אין איש וישתומם כי
 אין מפגיע ותושע לו זרעו וצדקתו היא
 סמכתהו¹⁷ וילבש צדקה כשרין וכובע

פרס לרעב לחמך ועניים מרודים תביא
 בית כי תראה ערם וכסיתו ומבשרך לא
 תתעלם⁸ אז יבקע כשחר אורך וארכתך
 מהרה תצמח והלך לפניך צדקך כבוד
 יהוה יאספך⁹ אז תקרא ויהוה יענה
 תשוע ויאמר הנני אם תסיר מתוכך מוטה
 שלח אצבע ודבר און¹⁰ ותפק לרעב
 נפשך ונפש נענה תשביע וזרח בחשך
 אורך ואפלתך כצהרים¹¹ ונחך יהוה
 תמיד והשביע בצחצחות נפשך ועצמתך
 יחליץ והיית כגן רוה וכמוצא מים אשר
 לא יכזבו מימיו¹² ובנו ממך חרבות עולם
 מוסדי דור ודור תקומם וקרא לך גדר
 פרץ משבב נתיבות לשבת¹³ אם תשיב
 משבת רגלך עשות חפצך ביום קדשי
 וקראת לשבת ענג לקדוש יהוה מכבד
 וכבדתו מעשות דרכך ממצוא חפצך
 ודבר דבר¹⁴ אז תתענג על יהוה
 והרכבתך על במותי^{qn} ארץ והאכלתיך
 נחלת יעקב אביך כי פי יהוה דבר ם

59 הן לא קצרה יד יהוה מהושיע ולא
 כבדה אזנו משמוע² כי אם עונתיכם היו
 מבדלים בינכם לבין אלהיכם וחטאותיכם
 הסתירו פנים מכם משמוע³ כי כפיכם
 נגאלו בדם ואצבעותיכם בעון שפתותיכם
 דברו שקר לשונכם עולה תהגה⁴ אין

n Marks an anomalous form.

q We have abandoned or added a ketib/qere relative to BHS. In doing this we agree with L against BHS.

ולקדוש ישראל כי פארך¹⁰ ובנו בני נכר
 חמתוך ומלכיהם ישרתונך כי בקצפי
 הכיתוך וברצוני רחמתוך¹¹ ופתחו שעריך
 תמיד יומם ולילה לא יסגרו להביא אליך
 חיל גוים ומלכיהם נהוגים¹² כי הגוי
 והממלכה אשר לא יעבדוך יאבדו והגוים
 חרב יחרבו¹³ כבוד הלבנון אליך יבוא
 ברוש תדהר ותאשור יחדו לפאר מקום
 מקדשי ומקום רגלי אכבד¹⁴ והלכו אליך
 שחוח בני מעניך והשתחוו על כפות
 רגליך כל מנאצריך וקראו לך עיר יהוה
 ציון קדוש ישראל¹⁵ תחת היותך עזובה
 ושנואה ואין עובר ושמתיך לגאון עולם
 משובש דור ודור¹⁶ וינקת חלב גוים ושד
 מלכים תינקי וידעת כי אני יהוה מושיעך
 וגאלך אביר יעקב¹⁷ תחת הנחשת אביא
 זהב ותחת הברזל אביא כסף ותחת
 העצים נחשת ותחת האבנים ברזל
 ושמתי פקדתך שלום ונגשיך צדקה¹⁸ לא
 ישמע עוד חמס בארצך שד ושבר
 בגבולריך וקראת ישועה חומתיך ושעריך
 תהלה¹⁹ לא יהיה לך עוד השמש לאור
 יומם ולנגה הירח לא יאיר לך והיה לך
 יהוה לאור עולם ואלהיך לתפארתך²⁰ לא
 יבוא עוד שמשך וירחך לא יאסף כי יהוה
 יהיה לך לאור עולם ושלמו ימי
 אבלך²¹ ועמך כלם צדיקים לעולם יירשו
 ארץ נצר מטעו מטעי מעשה ידי
 להתפאר²² הקטן יהיה לאלף והצעיר לגוי

ישועה בראשו וילבש בגדי נקם תלבשת
 ויעט כמעיל קנאה¹⁸ כעל גמלות כעל
 ישלם חמה לצריו גמול לאיביו לאיים
 גמול ישלם¹⁹ וייראו ממערב את שם
 יהוה וממזרח שמש את כבודו כי יבוא
 כנהר צר רוח יהוה נססה בו²⁰ ובא לציון
 גואל ולשבי פשע ביעקב נאם
 יהוה²¹ ואני זאת בריתי אותם אמר יהוה
 רוחי אשר עליך ודברי אשר שמתני בפיך
 לא ימוש מפיך ומפי זרעך ומפי זרע
 זרעך אמר יהוה מעתה ועד עולם ׀

60 קומי אורי כי בא אורך וכבוד יהוה
 עליך זרח² כי הנה החשך יכסה ארץ
 וערפל לאמים ועליך יזרח יהוה וכבודו
 עליך יראה³ והלכו גוים לאורך ומלכים
 לנגה זרחך⁴ שאי סביב עיניך וראי כלם
 נקבצו באו לך בניך מרחוק יבאו ובנתוך
 על צד תאמנה⁵ אז תראי ונהרת ופחד
 ורחב לבבך כי יהפך עליך המון ים חיל
 גוים יבאו לך⁶ שפעת גמלים תכסך בכרי
 מדין ועיפה כלם משבא יבאו זהב ולבונה
 ישאו ותהלת יהוה יבשרו⁷ כל צאן קדר
 יקבצו לך אילי נביות ישרתונך יעלו על
 רצון מזבחי ובית תפארתי אפאר⁸ מי
 אלה כעב תעופינה וכיונים אל
 ארבתיהם⁹ כי לי איים יקוו ואניות
 תרשיש בראשנה להביא בניך מרחוק
 כספם וזהבם אתם לשם יהוה אלהיך

62 למען ציון לא אחשה ולמען ירושלם
לא אשקוט עד יצא כנגה^c צדקה
וישועתה כלפיד יבער² וראו גוים צדקך
וכל מלכים כבודך וקרא לך שם חדש
אשר פי יהוה יקבנו³ והיית¹ עטרת
תפארת ביד יהוה וצנוף⁴ וצניף⁵ מלוכה בכף
אלהיך⁴ לא יאמר לך עוד עזובה ולא רצך
לא יאמר עוד שממה כי לך יקרא חפצי
בה ולא רצך בעולה כי חפץ יהוה בך
וארצך תבעל⁵ כי יבעל בחור בתולה
יבעלוך בניך ומשוש חתן על כלה ישיש
עליך אלהיך⁶ על חומתיך ירושלם
הפקדתי שמרים כל היום וכל הלילה
תמיד לא יחשו המזכרים את יהוה אל
דמי לכם⁷ ואל תתנו דמי לו עד יכונן ועד
ישים את ירושלם תהלה בארץ⁸ נשבע
יהוה בימינו ובזרוע עזו אם אתן את דגנך
עוד מאכל לאיביך ואם ישתו בני נכר
תירושך אשר יגעת בו⁹ כי מאספיו
יאכלהו והללו את יהוה ומקבציו ישתהו
בחצרות קדשי¹⁰ עברו עברו
בשערים פנו דרך העם סלו סלו המסלה
סקלו מאבן הרימו נס על העמים¹¹ הנה
יהוה השמיע אל קצה הארץ אמרו לבת
ציון הנה ישעך בא הנה שכרו אתו

c We read one or more accents in L differently than BHS. Often this notation indicates a typographical error in BHS.

1 BHS has been faithful to the Leningrad Codex where there might be a question of the validity of the form and we keep the same form as BHS.

עצום אני יהוה בעתה אחישנה ם

61 רוח אדני יהוה עלי יען משח יהוה
אתי לבשר ענוים שלחני לחבש לנשברי
לב לקרא לשבויים דרור ולאסורים פקח
קוח² לקרא שנת רצון ליהוה ויום נקם
לאלהינו לנחם כל אבלים³ לשום לאבלי
ציון לתת להם פאר תחת אפר שמן
ששון תחת אבל מעטה תהלה תחת רוח
כהה וקרא להם אילי הצדק מטע יהוה
להתפאר⁴ ובנו חרבות עולם שממות
ראשנים יקוממו וחדשו ערי חרב שממות
דור ודור⁵ ועמדו זרים ורעו צאנכם ובני
נכר אכריכם וכרמיכם⁶ ואתם כהני יהוה
תקראו משרתי אלהינו יאמר לכם חיל
גוים תאכלו ובכבודם תתימרו⁷ תחת
בשתכם משנה וכלמה ירנו חלקם לכן
בארצם משנה יירשו שמחת עולם תהיה
להם⁸ כי אני יהוה אהב משפט שנא גזל
בעולה ונתתי פעלתם באמת וברית עולם
אכרות להם⁹ ונודע בגוים זרעם
וצאצאיהם בתוך העמים כל ראייהם
יכירום כי הם זרע ברך יהוה ם¹⁰ שוש
אשיש ביהוה תגל נפשי באלהי כי
הלבישני בגדי ישע מעיל צדקה יעטני
כחתן יכהן פאר וככלה תעדה כליה¹¹ כי
כארץ תוציא צמחה וכגנה זרועיה תצמיח
כן אדני יהוה יצמיח צדקה ותהלה נגד כל
הגוים

כסוס במדבר לא יכשלו¹⁴ כבהמה
 בבקעה תרד רוח יהוה תניחנו כן נהגת
 עמך לעשות לך שם תפארת¹⁵ הבט
 משמים וראה מזבל קדשך ותפארתך
 איה קנאתך וגבורתך המון מעיד ורחמך
 אלי התאפקו¹⁶ כי אתה אבינו כי אברהם
 לא ידענו וישראל לא יכירנו אתה יהוה
 אבינו גאלנו מעולם שמך¹⁷ למה תתענו
 יהוה מדרכיך תקשיח לבנו מיראתך שוב
 למען עבדיך שבטי נחלתך¹⁸ למצער
 ירשו עם קדשך צרינו בוססו
 מקדשך¹⁹ היינו מעולם לא משלת במ לא
 נקרא שמך עליהם לוא קרעת שמים
 ירדת מפניך הרים נולו

64 כקדח אש המסים מים תבעה אש
 להודיע שמך לצריך מפניך גוים
 ירגזו² בעשותך נוראות לא נקוה ירדת
 מפניך הרים נולו³ ומעולם לא שמעו לא
 האזינו עין לא ראתה אלהים זולתך יעשה
 למחכה לו⁴ פגעת את שש ועשה צדק
 בדרכיך יזכרוך הן אתה קצפת ונחטא
 בהם עולם ונושע⁵ ונהי כטמא כלנו
 וכבגד עדים כל צדקתינו ונבל כעלה כלנו
 ועוננו כרוח ישאנו⁶ ואין קורא בשמך
 מתעורר להחזיק בך כי הסתרת פניך
 ממנו ותמוגנו ביד עוננו⁷ ועתה יהוה
 אבינו אתה אנחנו החמר ואתה יצרנו
 ומעשה ידך כלנו⁸ אל תקצף יהוה עד

ופעלתו לפניו¹² וקראו להם עם הקדש
 גאולי יהוה ולך יקרא דרושה עיר לא
 נעזבה ׀

63 מי זה בא מאדום חמוץ בגדים
 מבצרה זה הדור בלבושו צעה ברב כחו
 אני מדבר בצדקה רב להושיע² מדוע
 אדם ללבושך ובגדיך כדרך בגת³ פורה
 דרכתך לבדי ומעמים אין איש אתי
 ואדרכם באפי וארמסם בחמתי ויז נצחם
 על בגדי וכל מלבושי אגאלתי⁴ כי יום
 נקם בלבי ושנת גאולי באה⁵ ואביט ואין
 עזר ואשתומם ואין סומך ותושע לי זרעי
 וחמתי היא סמכתני⁶ ואבוס עמים באפי
 ואשכרם בחמתי ואוריד לארץ
 נצחם ׀⁷ חסדי יהוה אזכיר תהלת
 יהוה כעל כל אשר גמלנו יהוה ורב טוב
 לבית ישראל אשר גמלם כרחמיו וכרב
 חסדיו⁸ ויאמר אך עמי המה בניס לא
 ישקרו ויהי להם למושיע⁹ בכל צרתם לא
 לו צר ומלאך פניו הושיעם באהבתו
 ובחמלתו הוא גאלם וינטלם וינשאם כל
 ימי עולם¹⁰ והמה מרו ועצבו את רוח
 קדשו ויהפך להם לאויב הוא נלחם
 במ¹¹ ויזכר ימי עולם משה עמו איה
 המעלם מים את רעי צאנו איה השם
 בקרבנו את רוח קדשו¹² מוליד לימין
 משה זרוע תפארתו בוקע מים מפניהם
 לעשות לו שם עולם¹³ מוליכם בתהמות

ועמק עכור לרבץ בקר לעמי אשר
 דרשוני¹¹ ואתם עזבי יהוה השכחים את
 הר קדשי הערכים לגד שלחן והממלאים
 למני ממסך¹² ומניתי אתכם לחרב וכלכם
 לטבח תכרעו יען קראתי ולא עניתם
 דברתי ולא שמעתם ותעשו הרע בעיני
 ובאשר לא חפצתי בחרתם פ
¹³ לכן כה אמר אדני יהוה הנה עבדי
 יאכלו ואתם תרעבו הנה עבדי ישתו
 ואתם תצמאו הנה עבדי ישמחו ואתם
 תבשו¹⁴ הנה עבדי ירנו מטוב לב ואתם
 תצעקו מכאב לב ומשבר רוח
 תילילו¹⁵ והנחתם שמכם לשבועה
 לבחירי והמיתך אדני יהוה ולעבדיו יקרא
 שם אחר¹⁶ אשר המתברך בארץ יתברך
 באלהי אמן והנשבע בארץ ישבע באלהי
 אמן כי נשכחו הצרות הראשנות וכי
 נסתרו מעיני¹⁷ כי הנני בורא שמים
 חדשים וארץ חדשה ולא תזכרנה
 הראשנות ולא תעלינה על לב¹⁸ כי אם
 שישו וגילו עדי עד אשר אני בורא כי
 הנני בורא את ירושלים גילה ועמה
 משוש¹⁹ וגלתי בירושלם וששתי בעמי
 ולא ישמע בה עוד קול בכי וקול
 זעקה²⁰ לא יהיה משם עוד עול ימים וזקן
 אשר לא ימלא את ימיו כי הנער בן מאה
 שנה ימות והחוטא בן מאה שנה
 יקלל²¹ ובנו בתים וישבו ונטעו כרמים
 ואכלו פרים²² לא יבנו ואחר ישב לא

מאד ואל לעד תזכר עון הן הבט נא עמך
 כלנו⁹ ערי קדשך היו מדבר ציון מדבר
 היתה ירושלים שממה¹⁰ בית קדשנו
 ותפארתנו אשר הללוך אבתינו היה
 לשרפת אש וכל מחמדינו היה
 לחרבה¹¹ העל אלה תתאפק יהוה
 תחשה ותעננו עד מאד ס

65 נדרשתי ללוא שאלו נמצאתי ללא
 בקשני אמרתי הנני הנני אל גוי לא קרא
 בשמי² פרשתי ידי כל היום אל עם סורר
 ההלכים הדרך לא טוב אחר
 מחשבתיהם³ העם המכעיסים אותי על
 פני תמיד זבחים בגנות ומקטרים על
 הלבנים⁴ הישבים בקברים ובנצורים ילינו
 האכלים בשר החזיר **ופרק ומרק** פגלים
 כליהם⁵ האמרים קרב אליך אל תגש בי
 כי קדשתיך אלה עשן באפי אש יקדת כל
 היום⁶ הנה כתובה לפני לא אחשה כי
 אם שלמתי ושלמתי על חיקם⁷ עונתיכם
 ועונת אבותיכם יחדו אמר יהוה אשר
 קטרו על ההרים ועל הגבעות חרפוני
 ומדתי פעלתם ראשנה **על אל**
 חיקם ס⁸ כה אמר יהוה כאשר ימצא
 התירוש באשכול ואמר אל תשחיתו כי
 ברכה בו כן אעשה למען עבדי לבלתי
 השחית הכל⁹ והוצאתי מיעקב זרע
 ומיהודה יורש הרי וירשוה בחירי ועבדי
 ישכנו שמה¹⁰ והיה השרון לנוה צאן

אחד אם יולד גוי פעם אחת כי חלה גם ילדה ציון את בניה ⁹ האני אשביר ולא אוליד יאמר יהוה אם אני המוליד ועצרתני אמר אלהיך ¹⁰ שמחו את ירושלם וגילו בה כל אהביה שישו אתה מושוש כל המתאבלים עליה ¹¹ למען תינקו ושבעתם משד תנחמיה למען תמצו והתענגתם מזיז כבודה ¹² כי כה אמר יהוה הנני נטה אליה כנהר שלום וכנחל שוטף כבוד גוים וינקתם על צד תנשאו ועל ברכים תשעשעו ¹³ כאיש אשר אמו תנחמנו כן אנכי אנחמכם ובירושלם תנחמו ¹⁴ וראיתם ושש לבכם ועצמותיכם כדשא תפרחנה ונודעה יד יהוה את עבדיו וזעם את איביו ¹⁵ כי הנה יהוה באש יבוא וכסופה מרכבתיו להשיב בחמה אפו וגערתו בלהבי אש ¹⁶ כי באש יהוה נשפט ובחרבו את כל בשר ורבו חללי יהוה ¹⁷ המתקדשים והמטהרים אל הגנות אחר ^{אחר} אחת בתוך אכלי בשר החזיר והשקץ והעכבר יחדו יספו נאם יהוה ¹⁸ ואנכי מעשיהם ומחשבתייהם באה לקבץ את כל הגוים והלשונות ובאו וראו את כבודי ¹⁹ ושמתי בהם אות ושלחתי מהם פליטים אל הגוים תרשיש פול ולוד משכי קשת תבל ויון האיים הרחקים אשר לא שמעו את שמעי ולא ראו את כבודי והגידו את כבודי בגוים ²⁰ והביאו את כל אחיכם מכל

יטעו ואחר יאכל כי כימי העץ ימי עמי ומעשה ידיהם יבלו בחירי ²³ לא ייגעו לריק ולא ילדו לבהלה כי זרע ברוכי יהוה המה וצאצאיהם אתם ²⁴ והיה טרם יקראו ואני אענה עוד הם מדברים ואני אשמע ²⁵ זאב וטלה ירעו כאחד ואריה כבקר יאכל תבן ונחש עפר לחמו לא ירעו ולא ישחיתו בכל הר קדשי אמר יהוה ^ס

66 כה אמר יהוה השמים כסאי והארץ הדם רגלי אי זה בית אשר תבנו לי ואי זה מקום מנוחתי ² ואת כל אלה ידי עשתה ויהיו כל אלה נאם יהוה ואל זה אביט אל עני ונכה רוח וחרד על דברי ³ שוחט השור מכה איש זובח השעה ערף כלב מעלה מנחה דם חזיר מזכיר לבנה מברך און גם המה בחרו בדרכיהם ובשקוציהם נפשם חפצה ⁴ גם אני אבחר בתעלליהם ומגורתם אביא להם יען קראתי ואין עונה דברתי ולא שמעו ויעשו הרע בעיני ובאשר לא חפצתי בחרו ⁵ שמעו דבר יהוה החרדים אל דברו אמרו אחיכם שנאיכם מנדיכם למען שמי יכבד יהוה ונראה בשמחתכם והם יבשו ⁶ קול שאון מעיר קול מהיכל קול יהוה משלם גמול לאיביו ⁷ בטרם תחיל ילדה בטרם יבוא חבל לה והמליטה זכר ⁸ מי שמע כזאת מי ראה כאלה היוחל ארץ ביום

הגוים מנחה ליהוה בסוסים וברכב
ובצבים ובפרדים ובכרכרות על הר קדשי
ירושלם אמר יהוה כאשר יביאו בני
ישראל את המנחה בכלי טהור בית
יהוה²¹ וגם מהם אקח לכהנים ללויים
אמר יהוה²² כי כאשר השמים החדשים
והארץ החדשה אשר אני עשה עמדים
לפני נאם יהוה כן יעמד זרעכם
ושמכם²³ והיה מדי חדש בחדשו ומדי
שבת בשבתו יבוא כל בשר להשתחות
לפני אמר יהוה²⁴ ויצאו וראו בפגרי
האנשים הפשעים בי כי תולעתם לא
תמות ואשם לא תכבה והיו דראון לכל
בשר

End of Isaiah

The Westminster Leningrad Codex

Version 4.16

Isaiah

Attributed to:

Shemu'el ben Ya'akov
Aharon ben-Mosheh ben-Asher
ca 1008

Active maintenance of machine-readable version:

Stephen K. Salisbury, Editor
steve@grovescenter.org

Kirk E. Lowery, Senior editor
kirk@grovescenter.org

Transcription to Unicode/XML:

Christopher V. Kimball
transcriber@tanach.us

Edition:

Unicode/XML Westminster Leningrad Codex

<http://www.tanach.us/Tanach.xml>

Transcribed by WLC2XML of 6 Jun 2010 at 01 Jun 2012 @ 10:24:07. Build number:
23.0. Converted to ODT by XML2ODT.xml dated 22 Dec 2010 on 2012.06.01-10.26.
Build number: 23.0 . 51 pages. Layout: Full; Content: Consonants.

This document is in the public domain.